

**Наим КАРИМОВ**

# **МАҲМУДХЎЖА БЕҲБУДИЙ**

Тошкент – 2010

Маҳмудхўжа Беҳбудий XX аср бошларида Туркистонда вужудга келган миллий уйғониш ҳаракатининг атоқли раҳбарларидан бири бўлиб, шу даврда ўзбек халқи ижтимоий онгининг уйғонишида муҳим роль ўйнади. У Туркистонда янги усул мактабларининг очилиши, миллий матбуотнинг юзага келишида фаол иштирок этибгина қолмай, биринчи ўзбек драмасини яратиб, профессионал ўзбек театр санъатининг майдонга келишига замин ҳозирлади. У халқ ва жамиятни маърифатлаштириш орқали мустақилликка эришиш ғоясини олға сурган ва шу қутлуғ йўлда ҳалок бўлган улуғ аждодимиздир.

Кўлингиздаги рисола сиз, хурматли китобхонга Маҳмудхўжа Беҳбудийнинг ҳаёти, адабий ва ижтимоий фаолияти билан яқиндан танишиш имкониятини беради, деб умид қиласиз.

\*\*\*

Устоз Ойбек ўзининг ҳайёмона рубоийларининг бирида: «Донолар ўтдилар – сафари узоқ, Қуёшдай ботдилар – манзили тупроқ”, деб ёзган эди.

Бундан ўн йил илгари тугаб, тарих бағрига кирган XX асрда ўзбек халқининг шундай фарзандлари дунёга келиб, халқимиз ва мамлакатимиз тарихида абадул абад қоладиган улуғ ишларни амалга ошириб кетдиларки, гарчанд қуёшдай ботиб, она тупроқни ўзларига аллақачон ватан айлаган бўлсалар-да, улар номи ҳеч қачон ўчмайди ва улар ҳамиша миннатдор авлодлар хотирасида абадий яшайдилар. XX асрда Туркистон заминида туғилиб, халқ ва Ватанинг хур келажаги йўлида яшаган донолардан бири, шубҳасиз, Маҳмудхўжа Беҳбудийдир.

Турли тарихий-ижтимоий сабабларга кўра, бир замонлар жаҳоннинг энг қудратли давлатларидан бири бўлган Туркистоннинг XIX аср ўрталарида мустамлакага айланиши ва ҳатто янги ҳаёт шабадалари эса бошлаган XX аср аввалида ҳам мустамлакачилик шароитида яшави халқнинг илғор ва тараққийпарвар фарзандларида ор-номус учун, ҳақ-хуқуқ учун, эрк ва хуррият учун кураш истагини уйғотди. Бу истак М.Беҳбудий сингари сиймолар туфайли дастлаб ғояга, сўнгра тарихий заруратга айланди. Аммо бу ғоя ва заруратни амалга ошириш йўли бир-биридан кучли тўсиқлар билан тўсилган эди. Бу тўсиқларнинг энг даҳшатлиси халқ оммасининг парокандалиги, ижтимоий ва ҳуқуқий онгининг тубанлиги эди. Шунинг учун ҳам М.Беҳбудий ва унинг сафдошлари хуррият учун курашнинг дастлабки ва зарурий босқичи - халқ ва жамиятни маърифат билан “қуроллантириш” йўлини танладилар. Бу, ўз вақтида, “жадидчилик ҳаракати” деб аталди. Кейинчалик тарихчилар унга “миллий уйғониш ҳаракати” деган ном бердилар.

“Жадид” арабча сўз бўлиб, “янги” маъносини англаатади. XX

аср бошларида миллий газеталар ва янги усул мактабларининг пайдо бўлиши билан “жадид” сўзи истеъмолга кира бошлаган. Кимки шу газеталарга обуна бўлиб ёки уларни сотиб олиб ўқиган бўлса, у оддий кишилар кўзига “жадид” бўлиб қўринган. Худди шунингдек, кимки мадраса ва эски мактаб таълимидан замонавийлиги билан, дунёвий фанларнинг устуворлиги билан фарқланувчи янги усул мактабларини очган бўлса, шу киши ҳам жадид бўлиб туюлган. Хуллас, кимки халқ ва жамият ҳаётига янги ҳаёт шабадаларини, янги тарихий давр ғояларини олиб кириш истагида яшаётган бўлса, жадид ҳисобланган. Шу тарзда “жадид мактаби”, “жадид газетаси”, “жадид шоир” сингари тушунчалар юзага келган.

Ҳар қандай янгилик қаршисида катта тўғаноқлар пайдо бўлади. Халқ оммасининг руҳий ва маиший ҳаётида шаклланиб, эскириб ва қотиб қолган одатларни янгилаш мушкул бўлганидек, янги мактабларнинг очилиши ва ўқувчиларнинг бу мактабларга жалб этилиши ҳам осон кечмади. Мутаассиблар жадид муаллимларни “кофир” деб эълон қилдилар. Маҳалла оқсоқоллари ўз фарзандини жадид мактабига берган оталарни оиласи билан маҳалладан кўчириб юбораман, деб дағдаға қилиб, жадид мактабларни ёпа бошладилар. Шундай мураккаб шароитда халқнинг ижтимоий ва ҳуқуқий онгини ошириш, уни дунёвий билимлардан баҳраманд қилиш осон эмас эди. Шунинг учун ҳам биз, миллий уйғониш ҳаракати ва адабиётининг тадқиқотчилари, жадидларни халқ ва мамлакатнинг мунаvvар келажаги йўлида фаолият олиб борган фидойи кишилар сифатида чин дилдан хурмат қиласиз.

XX аср бошларида мамлакатимизда миллий уйғониш ҳаракатини бошлаб берган фидойи кишилардан бири ва балки биринчиси ушбу рисола қаҳрамони Маҳмудхўжа Беҳбудийдир.

Беҳбудий вафотининг икки йиллиги муносабати билан “Маориф ва ўқитувчи” журналида эълон қилинган мақоласида Лазиз Азиззлда бундай ёзган эди: «Унинг қиммати тарихнинг маълум бир босқичида ва тарихий ривожланишида қилган

хизмати учундир. Беҳбудийнинг хизмати французларнинг Жан Жак Рассолари, русларнинг Ломоносов, Чернишевский, Добролюбовлари, Кафқаз туркларининг Фатҳали Охундов ва Нажафбек Вазировлари, татарларнинг Ш.Маржоний ва Қ.Носирийси ила бирдир. Ўзбек илмий адабиёти ҳам Беҳбудий билан бошланиб, янги бир йўлга кира бошлади. Беҳбудий энг аввал Туркистоннинг чор ҳукумати қўлидан қутқазиш ғоясини элга талқин қилувчилардан, аҳолининг эзилганлигини биринчи сезганлардан ва бу ҳақда турли уста йўллар ила ҳалқни истиқбол курашига чақирганлардандир. Туркистоннинг уйғониш даврини уч қисмга - маориф, матбуот ва жамиятга бўлиб, шу давр раҳбарларини текшира бошласак, бу ҳаракатларнинг бошида Беҳбудий турганлигини кўрамиз”.

Беҳбудий шаънига айтилган бу сўзларда унинг маориф ва маданиятимиз тарихидаги ўрни ҳам, миллий озодлик курашидаги хизматлари ҳам, умуман, ўзбек ҳалқи тарихида қолдирган излари ҳам аниқ ифодаланган.

### **М.Беҳбудий ҳаёти ва фаолиятини ўрганиш тарихига бир назар**

Биринчи ўзбек драмаси - “Падаркуш”нинг 1913 йилда сахна юзини қўриши Туркистоннинг маданий ҳаётида муҳим тарихий воқеа бўлди. Томошибинлар оммасини ҳайратга солган бу асарнинг турли шаҳарларда турли ҳаваскорлик труппалари томонидан намойиш этилиши муносабати билан ўша йилийёк матбуотда қатор хабар ва мақолалар эълон қилинди. Шубҳасиз, бу мақолаларда асар ва унинг муаллифи тўғрисида ҳам айрим фикрлар билдирилди. Аммо М.Беҳбудий ҳаёти ва фаолиятига бўлган қизиқиш маърифатпарвар адабнинг дастлаб сирли равишда ғойиб бўлиши, сўнгра фожиали равишда вафот этиши билан бевосита боғлиқ. М.Беҳбудий шу вақтга қадар ҳам муфти, ҳам Туркистон жадидларининг отаси сифатида катта эътибор

қозонганлиги сабабли унинг ўлими Туркистонни том маънода ларзага келтириди.

Агар миллий уйғониша ҳаракати даврининг шу мусибатли даврида М.Беҳбудий ҳақида эълон қилинган хабар ва мақолаларга хронология талаблари асосида ёндашсак, даставвал Ҳожи Муиннинг “Қадрношунослик” (“Меҳнаткашлар товуши”, 1919 йил 23 апрель) деган кичик мақоласини тилга олиш лозим бўлади. Ушбу мақолада 1919 йилнинг март ойларида М.Беҳбудийнинг Мардонкул Шомуҳаммадзода, Мухаммадқул Ўринбой ўғли ва турк муаллими Наъим афанди билан бирга (халқнинг сўзига кўра) Москвага ёки бошқа бирор жойга бориш ниятида йўлга чиққани ҳамда Қарши шаҳрида Бек томонидан ҳибсга олиниб, зинданга ташлангани айтилган. Беҳбудий ва ҳамроҳларининг кейинги тақдирни шу мақола муаллифига маълум бўлмаганидек, мазкур мақоладан кейин эълон қилинган “Самарқандлик Темурхон афанди келди” мақоласида («Меҳнаткашлар товуши», 1919 йил 20 ноябрь) тилга олинган Темурхон афандига ҳам қоронғи бўлган. Бу мақолада айтилишича, Истанбулда ўқишида бўлган Темурхон афанди ватанига қайтишида Бокуда Беҳбудийнинг Бухоро музофотида қамоққа олинганини эшитган. Шу вақтда Бокуда бўлган таниқли маърифатпарвар ва тадбиркор Сайдносир Миржалилов “восита топиб”, Бухородан Беҳбудийнинг кейинги тақдирни тўғрисида маълумот олишга уринган, аммо бирор натижага эришмаган. Орадан қарийб бир йил ўтгач, «Меҳнаткашлар товуши» газетасида (1920 йил 8 апрель) номаълум муаллифнинг “Муфти Маҳмудхўжа Беҳбудийнинг таржимаи ҳоли” сарлавҳали мақоласи чоп этилади. Мақолада биз Беҳбудийнинг ҳаёт йўли, маърифатпарварлик фаолияти, авлодлари ҳақидаги маълумот, шунингдек, сирли сафарига оид тахминлар билан танишамиз.

1922 йилнинг март ойида Беҳбудийнинг фожиали ўлими ҳақидаги хабар етиб келиши билан эндилиқда “Зарафшон” номи билан чиқа бошлаган Самарқанд газетасининг 25 март сонида А.Азамат, Аблусалом Азимий, Вадуд Маҳмуд, Садриддин Айний ва

Ҳожи Муиннинг Беҳбудий ҳақидаги хотиралари эълон қилинади. Айни пайтда “Туркистон” газетасида (1922 йил 21 декабрь) “Беҳбудий мухлислариға очиқ хат”, Вадуд Маҳмуднинг “Беҳбудий ва унинг теграсига йиғилган ёзувчилар” (1923 йил 10 декабрь), “Учқун” журналида Ҳожи Муиннинг “Маҳмудхўжа Беҳбудий” (1923 йил, 1-сон), “Инқилоб” журналида (1922 йил, 1-сон) Ҳожи Муиннинг “Муфти Маҳмудхўжа Беҳбудий ҳазратларининг қандай шаҳид бўлганлиги ва онинг томонидан ёзилган васиятнома”, “Маориф ва ўқитувчи” журналида Лазиз Азиззоданинг “Беҳбудий” (1926 йил, 2-сон) мақолалари босилиб чиқади. Бу мақолаларда Беҳбудийнинг фожиали ўлими тафсилотлари билан бирга унинг Туркистон халқи олдиғаги улкан хизматлари хурмат билан ёд этилади. 1926 йилда Беҳбудий вафотининг 7 йиллиги Туркистон, Туркия ва Германияда (туркистонлик талабалар томонидан) кенг нишонланади. Аммо шундан кейин Беҳбудий номи секин-аста унутила бошлайди. Беҳбудий номи билан атала бошлаган Қарши шаҳрига 1934 йилдан бошлаб яна ўз номи қайтариб берилади. 1937 йилнинг бизга таниш воқеалари вақтида эса Беҳбудий номи ҳам “миллатчи” ва “халқ душманлари” қаторида қатағон этилади.

Большевиклар партиясининг XX съездида Сталин шахсига сифинтиришнинг фожиали оқибатлари юзага чиққач, 30-50-йилларда сиёсий қатағонга учраган минглаб бегуноҳ кишилар оқландилар. Аммо Ўзбекистонда бегуноҳ қвтвғон этилган А.Қодирий, Фитрат, Чўлпон сингари ёзувчиларнинг, шунингдек, М.Беҳбудийнинг оқланиб, ўзбек адабиёти ва маданияти тарихидаги қонуний ўрнининг тикланиши фавқулодда даражада қийин кечди. Мудҳиш йилларда шўро давлатининг сиёсий идораларига “халол” хизмат қилган кишилар ўз жиноятларининг фош этилишидан қўрқиб, бу сиймоларнинг оқланишига тинтироқлари билан қаршилик кўрсатдилар. Асосан “қайта қуриш ва ошкоралик” деб номланган даврда адабиётшунос ва тарихчи олимлар М.Беҳбудий, Чўлпон, Фитрат сингари “халқ душманлари” ҳаёти ва ижодини ўрганиш имкониятига эришдилар.

Шу даврда М.Беҳбудийни ва, умуман, жадид адабиётини ўрганишга бел боғлаган олимларнинг бири ва биринчиси филология фанлари номзоди Солиҳ Қосимовдир. Афсуски, унинг бирламчи манбалар асосида ўрганиб ёзган жадид адабиёти тўғрисидаги тадқиқоти ҳозирга қадар топилмай турибди. Лекин унинг вафотидан кейин !Ўзбекистон адабиёти ва санъати" ҳафталигининг 1990 йил 10 ва 26 январь сонларида босилган "Беҳбудий ва жадидчилик" деган мақоласи Беҳбудий ҳаёти ва фаолиятини янги тарихий давр талаблари асосида ўрганиш ишида муҳим воқеа бўлди. Олим бу тадқиқотида Беҳбудий ҳаёти, ижодий ва маърифий фаолиятининг энг муҳим нуқталарини факт ва далиллар асосида ёритиб берди. Айни вақтда фан номзодлари Шерали Турдиев, Аҳмад Алиев, Сирожиддин Аҳмад, шунингдек, Нормурод Авазов Беҳбудий ҳаёти ва ижодини ўрганиш ишига муҳим ҳисса қўшдилар. Айниқса, филология фанлари доктори Бегали Қосимов ва филология фанлари номзоди Ҳалим Саидов беҳбудийшуносликнинг фан тармоғи сифатила шаклланишида карvonбошилик қилдилар. Шубҳасиз, филология фанлари доктори Ҳамидулла Болтабоев, филология фанлари номзодлари ИброҳимFaфуров ва Бойбўта Дўстқораевнинг шу соҳадаги хизматлари ҳвм ҳурмат ва эътиборга сазовор. Бу олимларнинг изланишлари туфайли сўнгги ўн беш-йигирма йил ичida Беҳбудий ҳақида шу қадар қўп ва хўб рисола ва мақолалар майдонга келдики, уларнинг ҳар бирига муносабат билдириш мавзудан узоқланиш бўлурди.

Юқорида баён қилинган фикрлар ушбу рисоланинг майдонга келишида шу ҳурматли олимларнинг илмий изланишлари мўътабар манба бўлиб хизмат қилганки, буни уларга ҳурмат ва миннатдорлик билан айтиш каминанинг шарафли бурчидир.

### **Беҳбудий қачон туғилган?**

Ўтган асрнинг 10-йилларидан то шу кунга қадар

Маҳмудхўжа Беҳбудий ва унинг “Падарқуш” асари тўғрисида нафақат ўнлаб газета ва журнал мақолалари, балки ўқув дарслик ва қўлланмалари ҳам нашр этилган. Афсуски, Беҳбудий фожиали равишда вафот этганлиги сабабли ўзи ҳақида илмий-биографик аҳамиятга молик бирор мақола ёзил қолдирмаган. Шунинг учун ҳам Беҳбудийга бағишлиланган аксар мақола ва хотираларда адид ҳаётининг айрим саналари турлича қайд этилиб келади.

Ҳожи Муиннинг юқорида тилга олганимиз “Маҳмудхўжа Беҳбудий” (1923) деган мақоласида сарлавҳадан кейин қавс ичидаги 1874-1919 саналари берилган. Беҳбудий вафотининг З йиллиги муносабати билан рус тилида чоп этилган “Известия ТурЦИК” ва бошқа газеталарда унинг туғилган санаси 1873 йил, деб кўрсатилган. Адибнинг қизи Парвин Беҳбудий ҳам 1970 йил 17 октябрда Солиҳ Қосимов билан қилган сұхбатида отасининг 1873 йилда Самарқанд шаҳрининг Ёмини қишлоғида қори оиласида туғилганини айтган. 60-йиллардан кейин нашр этилган аксар мақола, рисола ва монографияларда адибнинг туғилган санаси 1875 йил, деб қайд этилиб келади.

Шундай қилиб, Беҳбудий ҳаёти ва адабий фаолияти билан шуғулланган адабиётшуносларнинг бир қисми унинг 1874 йилда, иккинчи қисми эса 1875 йилда дунёга келган, деб ҳисоблайдилар. Шу нарса ғаройибки, адибнинг таваллуд санасини белгилашда адабиётшуносларнинг ҳар икки гуруҳи ҳам Ҳожи Муиннинг қуидаги сўзларига асосланадилар: “1868 йилда, - деб ёзган эди у, - руслар Самарқандни забт этгач, Маҳмудхўжанинг отаси Беҳбудхўжа ўзининг оиласини олиб, Самарқанд уязининг Сиёб бўлусидаги Бахшитепа қишлоғига кўчуб чиқсан ва шунда 7 йил чамаси имом ва хатиб бўлғон. Беҳбудий афанди шул қишлоқда 1291 ҳижрий йилда 10-зулҳижжа ойида (1874, март) оқшом дунёга келган”. Агар адабиётшуносларнинг бир гуруҳи учун Ҳожи Муиннинг “1874, март” деган сўзлари муҳим бўлиб кўринган бўлса, иккинчи гуруҳи “1291 ҳижрий йил 10-зулҳижжа ойи”ни милодий йил ҳисобига кўчириш йўли билан Беҳбудийнинг 1875 йил 19 январда туғилганини, Ҳожи Муиннинг эса ҳижрий йил

ҳисобини милодий йил ҳисобига кўчиришда адашганини аниқлаганлар.

Юқорида кўрганимиздек, Беҳбудийнинг туғилган манзили тўғрисида ҳам турлича қарашлар мавжуд. Агар Ҳожи Муин ва унинг издошлари Беҳбудийнинг Бахшитепа қишлоғида туғилганини тасдиқлаган бўлсалар, Парвин Беҳбудий ва яна баъзи бир адабиётшунослар Ёмини қишлоғини Беҳбудийнинг киндик қони тўкилган жой сифатида тилга олиб келганлар.

Аммо бугун аниқ айтишимиз мумкинки, Туркистондаги миллий уйғониш даврининг оташин жарчиси Маҳмудхўжа Беҳбудий 1875 йил 19 январда Самарқанд вилоятининг Бахшитепа қишлоғида дунёга келган.

## Ота-бобоси ва ёшлик йиллари

Беҳбудийшунос олимларнинг рисола ва мақолаларидағи адаб ҳаётига оид қарийб барча маълумотлар Ҳожи Муиннинг устози ҳақидаги мақолаларидан олинган. Атоқли драматург ва журналист Ҳожи Муин (1883-1942) Беҳбудийнинг содиқ шогирдлари ва сафдошларидан бири бўлиб, унинг “Меҳнаткашлар товуши” ва “Зарафшон” газеталари ҳамда “Учқун” журналида чоп этилган мақолалари беҳбудийшунослар учун энг ишончли ва мўътабар манбадир. Шунинг учун ҳам қуйида Беҳбудийнинг насл-насаби билан Ҳожи Муин берган маълумот орқали танишишини айни муддао, деб биламиз.

“Маҳмудхўжа бин Беҳбудхўжа бин Солиҳхўжа бин Ниёзхўжа, - деб ёзади Ҳожи Муин, - Беҳбудийнинг юқори боболари. Насаб жиҳатидан Хўжа Аҳмад Яссавийга бориб етади”<sup>1</sup>.

Бу сўзларда тилга олинган Солиҳхўжа билан Ниёзхўжа Беҳбудийнинг боболари бўлиб, Ҳожи Муин уларнинг Аҳмад Яссавийга қариндошлиқ ришталари билан боғланганини алоҳида

<sup>1</sup> Ҳожи Муин. Танланган асарлар. Тўпловчи ва нашрга тайёрловчи Н.Намозова. - Тошкент: Маънавият, 2005. – Б. 19.

таъкидлайдики, унинг бу маълумотни Беҳбудийнинг ўзидан эшитганлигии шубҳа уйғотмайди.

“Беҳбудийнинг 2-бобоси Ниёзхўжа, - деб давом этади у, - ўзи модарзод кўр (сўқир) бўлуб, ёшлигидан Қуръонни ёдлаб, қори (ҳофизи Қуръон) бўлди. Бу зот Урганждан бўлуб, тақрибан бир аср илгари Самарқандға келиб, шунда ўринлашиб қолди. Шунинг учун бу киши Самарқандда халқ орасида Қори Ниёзхўжа Урганжий исми билан шухрат чиқарди. Бу кишининг Самарқандға қайси равишда келганлиги тўғрисида бу кунги болалари орасинда ушбу йўсунда ривоят бор.

12-асри ҳижрий ўрталарида Туркистон ўлкасидаги амир ва хонларнинг ўзаро қилишfon урушлари натижасида Самарқанд шахри хароб бўлуб, халқи ҳар томонга тарқалишиб кетган. Амир Шоҳмурод Самарқандни қайтадан обод этарға киришган. Самарқанд музофотидан ва Туркистоннинг бошқа шаҳарларидан анча одамларни ва бир неча муллаларни (оилалари билан) келтуруб шаҳарға ўрунлаштирифон. Булардан шаҳарда айрим гузар (маҳалла) лар ташкил этдурган. Шул чоғларда Урганжнинг машҳур қориларидан саналғон Ниёзхўжани Самарқандға келтуруб, янгидан қорилар етиштуриш ҳаракатида бўлғон.

Ниёзхўжадан Солиҳхўжа отли бир ўғил қолди. Бу киши ҳам қори бўлуб, улуми арабия ва диниядан хабардор эди. Ўзи қорилиқ ва имоматчилик билан тирикчилик этиб, руслар Самарқандни олмасдан бурун ўлди. Бул зотдан Беҳбудхўжа отлиғ бир ўғул, Ҳуринисо ва Нажиманисо исмларида икки қиз қолди. Солиҳхўжа ўзининг ўғли билан қизи Ҳуринисони ўзи ўқутди. Ҳат ва савод чиқорғонларидан сўнг аларға Қуръон ёдлатиб, қори қилдурди. Ҳатто қизи Ҳуринисоға бир миқдор арабий ва диний билимлар ўргатди. Қуръони каримни бутун ёдлағондан кейин Ҳуринисоға “қори бегим” лақаби берилиб, ўзининг қариндошлари ичida ҳам халқ орасида шул лақаб билан шухрат чиқарди. Отаси ўлгандан сўнг Ҳуринисо унинг бир неча шогирдларини Қуръонни тамом ёдлағонларигача ўқутуб юрди. Унинг учун ўшал замондаги амир хукумати томонидан ўн йилда 96 пуд ғалла вазифа берилиб

турди. Беҳбудхўжа ҳам ушбу синглиси ҳузурида қориликни такмил этди. Бу хотун 1921 йилда 98 ёшида вафот этди”<sup>2</sup>.

Ҳожи Муиннинг бу сўзларидан Маҳмудхўжа Беҳбудийнинг Самарқанддаги маърифатпарвар сулолалардан бирига мансуб бўлгани маълум бўлади. Яна Ҳожи Муиннинг сўзларидан шу нарса аён бўладики, Беҳбудийнинг бобоси Ниёзхўжа Урганжий Самарқандга XYIII аср ўрталарида қўчиб келган ва шу вақтда амир ва хонлар ўртасидаги ўзаро қурашлар натижасида Амир Темур ва Темурийлар даврида гуллаб яшнаган шаҳар хароб бўлиб, халқнинг ўқимишли кишилари она-юртларини ташлаб кетишга мажбур бўлишган. Бинобарин, Беҳбудийнинг бобоси билан бир даврда Самарқандга қўчиб келган қорилар зиммасига маҳаллий ёшларни “улуми арабия ва диния”дан хабардор этиш вазифаси тушган. (Бинобарин, Маҳмудхўжа Беҳбудий XX аср бошларида Туркистондаги миллий уйғониш ҳаракатига тамал тошини қўйиши билан ота-боболари бошлаган маърифатпарварлик ишларини янги тарихий давр шароитида давом эттирган.)

Ҳожи Муиннинг маълумот беришича, 1868 йилда рус қўшини Самарқандга бостириб киргач, Беҳбудхўжа оиласи билан Самарқанд уездининг Сияҳи об волостидаги Бахшитепа қишлоғига қўчиб ўтади ҳамда шу ерда тахминан етти йил давомида имом ва хатиблиқ лавозимини адo этади. Маҳмудхўжа 1875 йил 19 январь куни шу ерда дунёга келади.

Шу вақтда руслар Самарқанд ва атроф қишлоқларда ўқтин-ўқтин кўтарилиб турган қўзғолонларни бостириб, шаҳарда нисбатан тинч ҳаётни ўрнатишга муваффақ бўлган эдилар. Шунинг учун Беҳбудхўжа 1875 йили яна шаҳарга қўчиб бориб, оиласи билан Фоний маҳалласида истиқомат қиласиди. Унинг асл исми Султонхўжа бўлиб, Беҳбудхўжа лақаби бўлган. “Яхшилик” ва “соғломлик”, “фойда” ва “нажот” маъноларини англатувчи “беҳбуд” сўзи бора-бора исмга айланган.

Қорилик ва имом-хатиблик орқасида каттагина давлат

---

<sup>2</sup> Ўша асар. - Б. 19-20.

орттирган Беҳбудхўжанинг беш хотини бўлиб, Маҳмудхўжа унинг иккинчи хотинидан туғилган.

Беҳбудий 6-7 ёшлиқ чоғида катта тоғаси Муҳаммад Сиддиқ қўлида хат ва савод чиқаради. Шундан сўнг отаси Беҳбудхўжа ўғлини қориликка тайёрлаш мақсадида Куръонни оз-оздан ўргатиб ёд олдиради. Маҳмудхўжа уч-тўрт йил ичидан Куръонни тўла ёд олиб, рамазон кечаларида хатм қиласди.

“Беҳбудий афанди, - деб ёзади Ҳожи Муин, - ёлғуз қорилиқ билан қаноатланмай, ўзининг тоғаси муфти мулла Одил хузурида дарс ўқурга киришди. Арабий сарф, нахвдан “Қофия” ва “Шарҳи мулло”ни, “Шамсия”ни, фикҳдан “Мухтасар ул-виқоя”нинг биринчи дафтарини ва бир оз “Хошия”ни мазкур зотнинг ҳалқаи тадрисида ўқуди. Ҳисоб илмини ҳам (масоҳат<sup>1</sup>гача) шул кишидан ўрганди...

Беҳбудий афанди дарс жамоасининг қориси эди. Тоғаси ҳам устози муфти мулла Одилнинг сўзига кўра, Беҳбудий афанди ёшлиқ чоғида ўткур зеҳнлик ва ўқушға жуда ҳаваслиқ бўлғон. Устозининг бир қатла ўргатиши билан сабоқини ўрганаар экан. Ўзи ҳалим, адаблиқ, оз сўзлик ва ўйун-кулгуни севмайтурғон бўлғон<sup>2</sup>.

Беҳбудийнинг онаси 1893 йилда, отаси эса 1894 йилда вафот этади. Маҳмудхўжа отаси вафотидан кейин ўқишни ташлаб, мустақил турмуш тебратишини ихтиёр қиласди ва тоғаси Муҳаммад Сиддиқ хузурида мирзолик вазифасини бажаради. У икки йиллик хизмати давомида козилик ишлари билан танишиб, муфтилик учун зарур бўлган нарсаларни ўрганиб олади. Тоғаси қозилик лавозимидан бўшагач, Кобуд волости қозиси мулла Забир хузурига бориб, мирзолик вазифасини бажаришда давом этади. Аммо орадан икки ой ўтмай, муфтиликка ўтади ва 1916 йилга қадар шу ерда хизмат қиласди.

Беҳбудий шу вақтда оиласи билан шаҳарда истиқомат қилганига қарамай, ҳафтада бир неча маротаба мазкур

<sup>1</sup> Масоҳат – ер ўлчови.

<sup>2</sup> Ўша асар. – Б. 21.

қозихонага бориб турган ва шу ердан бир неча таноб ер олиб, дехқончилик билан ҳам шуғулланган.

## Муфтилик фаолияти

Маҳмудхўжа Беҳбудий номини тилга олганларида замондошлар унинг исм-шарифи олдига, албатта, “муфти” увонини қўшиб айтганлар. Орадан қанча даврлар ўтган бўлмасин, шу анъана ҳозирги қадар давом этиб келади ва адабиётшунослар адид номини хурмат юзасидан бугун ҳам “муфти Маҳмудхўжа Беҳбудий” деб тилга оладилар.

Бизга замондош олимлар орасида Беҳбудийнинг муфтилик фаолиятини биринчи бўлиб ёритган адабиётшунос Солиҳ Қосимовдир. У “Ўзбекистон адабиёти ва санъати” ҳафталигининг 1990 йил 19 январь сонида чоп этилган “Беҳбудий ва жадидчилик” номли мақоласида шу мавзуни ёритишдан аввал бундай сўзларни ёзган: “Собиқ Туркистоннинг ҳар бир кент ва даҳасида қозихоналарнинг, уларда хизмат қилган қози ва муфтиларнинг сон-саноғи бўлмаган. Бироқ Беҳбудийдек баркамол шахс – фақат диний билимларгина эмас, шу билан бирга замонавий илмларнинг зўр билимдони, халқни маърифатли қилиш учун кураш йўлида ўз моддий бойликларини, ҳатто жонини аямаган шахснинг мисли ниҳоятда сийракдир, ҳатто яктордир. Фвийзулла Хўжаевнинг сўзлари билан айтганда, “Сиёсий, ижтимоий фаолияти ва билимининг кенглиги жиҳатидан Туркистоннинг ўша вақтдаги жадидларидан унга тенг киладиган киши бўлмаса керак”.

Кези келганда шуни айтиш жоиз ва ҳатто лозимки, Солиҳ Қосимов жадидчилик мавзуи билан қизиқсан 60-йилларда Самарқанд ва Душанбеда, кексайган бўлишларига қарамай, Беҳбудийни кўрган ва билган кишилар озми-кўпми бўлган. Солиҳ Қосимов ана шу имкониятдан фойдаланиб, улар билан учрашган ва уларнинг адид ҳақидаги хотираларини ёзиб олган. Афсуски,

олим вафотидан кейин унинг Туркистон жадидчилигига бағишланган китоби қўлёзмаси ҳам, Беҳбудий замондошларидан ёзиб олинган аксар хотираларининг матни ҳам изсиз йўқолган.

С.Қосимов ёзиб олган ва бизгача етиб келган хотиралардан бири адабнинг қизи Парвин Беҳбудийга мансуб бўлиб, у отасининг муфтилик фаолияти тўғрисида бундай сўзларни айтган:

“Маҳмудхўжа ўқишининг бошлавнғич давридан (Ҳафтияк ва Чор китоб) ўтгач, қорилар мактабига ўқишга киради. Хотираси яхши бўлганлиги боис Қуръонни икки йил ичидаги ёд олади ва қорилик дипломига эга бўлади. Шундан кейин Маҳмудхўжа доимий равишда бўлмаса-да, Самарқанд ва Бухоро мадрасаларига қатнаб туради. У бутун умри давомида китобдан узоқлашгани йўқ.

Қорилар мактабини тугатгач, у қишлоқ жойларидаги қози ва муфтиларга мирзалик вазифасида ишлади. Чамаси, бу даврда фикҳ китоблари устида тинимсиз ишлагани боис у тез фурсатда “муфти” унвонига эришди. Маҳмудхўжа умрининг охиригача Жомбойда муфтилик қилди. Одатда шанба кунлари ҳафтада бир марта Жомбойга бориб, қозилар билан биргаликда баҳсли мунозараларни ечардилар”<sup>1</sup>.

Ушбу хотира ёзиб олинган вақтда хотиранавис кексайиб қолганлиги туфайлими “қорилик мактаби”, “қорилик дипломи” сингари сўзларни айтганки, сиз, ҳурматли китобхонлар, бундай мактаб ва дипломларнинг бўлмаганидан хабардор бўлсангиз керак.

Маълумки, Беҳбудий 1918 йилнинг май ойида Самарқанд Мусулмон ишчилар шўросида вилоят маориф комиссари лавозимида хизмат қилган. С.Қосимов юқорида тилга олинган мақоласида Беҳбудийнинг шу лавозимда хизмат қилган вақтида ҳам муфтилик вазифасини бажарганини айтиб, бундай ҳақ гапни ёзган: “...замонасидаги фақихлар – диний билим

---

<sup>1</sup> Парвин Беҳбудий хотираси қуйидаги манбада эълон қилинган: Ҳалим Сайдов. Маръифат либосидаги озодлик. – Тошкент: Шарқ, 2000. - Б. 149-

билимдонларидан ҳеч бири фикҳ илмининг кенглиги жиҳатидан Беҳбудийга тенг келолмас эди. Бироқ Беҳбудийнинг айrim реакцион руҳонийлардан фарқи ва афзалиги шунда эдики, у ҳеч қачон фикҳнинг бирор қоидаси ёки йўл-йўриғи халқ манфаатлари ва ижтимоий тараққиётга заарар келтирадиган тарзда талқин қилмаган. Аксинча, оят ва ҳадисларга таянган ҳолда меҳнаткашлар манфаатини ҳимоя этган, илм-маърифатга чорлаган европаликлар билан дўстона муносабатларни ривожлантиришга чорловчи фатволар берган. Ҳожимурод Худойбердиев<sup>1</sup>нинг ҳикоя қилишичи, Беҳбудий иқтисодий низоларда деярли ҳамма вақт йўқсил манфаатини ҳимоя қилган, ғорат ва хунрезлик бўлмаган ғавғоларнинг деярли ҳаммасини камбағаллар фойдасига ҳал қилинишига эришган”<sup>2</sup>.

Беҳбудий муфтилик лавозимини қачондан бошлаб бажара бошлаган? Муфтининг қозидан қандай фарқи бор? Умуман, “муфти” атамаси нимани англатади? Бу саволларнинг биринчисига жавоб бериш учун яна Ҳожи Муинга мурожаат этайлик. У Beҳbuдийга бағишлиган бошқа бир мақоласида шу ҳақда бундай ёзган: «...Beҳbuдий афанди Кобуд бўлусининг қозиси мулла Зубайрнинг қозихонасига мирзоликка кириб, бунда 1-2 ой ўтмай, муфтиликка ўтди. Неча йиллар **шунда** (таъкид бизники – H.K.) муфтилик билан кун кечирди”<sup>3</sup>.

“Муфти” арабча сўз бўлиб, фатво берувчи, диний масалаларда қарор чиқарувчи маъноларини англатади. “Муфти, - деб ёзилган “Ислом эгцикlopедияси”да, - диний-хукуқий масалаларни изоҳлаш, талқин қилиб бериш, шариатни татбиқ этиш борасида ҳал қилувчи хукуққа эга. Одатда унинг фикр ва қарорлари фатволарда баён этилиб, мусулмонлар учун қўлланма хисобланади”<sup>4</sup>.

---

<sup>1</sup> Қарши шаҳрида қизил гвардиячилар тўдасига қўмондонлик қилган самарқандлик йигит. У билан ушбу рисоланинг сўнгги фасларида яна учрашамиз.

<sup>2</sup> «Ўзбекистон адабиёти ва санъати” ҳафталиги, 1990 йил 19 январь.

<sup>3</sup> Ҳожи Муин. Танланган асарлар. – Б. 25.

<sup>4</sup> Ислом энциклопедияси, - Тошкент, 2004. – Б. 171.

Сир эмас, XX асрнинг 20-йиллари гача муфтиининг фатво тарзида ифодаланган “фикр ва қарорлари”, “Ислом энциклопедияси”да ёзилганидек, мусулмонлар учун қўлланма эмас, балки буйруқ ҳисобланган. Беҳбудий шундай катта ҳуқуқларга эга бўлган шариат билимдони эди.

Самарқандлик журналист Нусрат Раҳмат узоқ йиллардан бери Беҳбудий ҳаётини, шу жумладан, унинг муфтилик фаолиятини ўрганиб келади. У “Ёзувчи” газетасининг 2000 йил 6 май сонидаги “Муфти” сарлавҳали мақоласида, чамаси, адабнинг набираси Мидҳат Беҳбудийнинг хотираларига таянган ҳолда бундай сўзларни ёзган:

“Маҳмудхўжа Беҳбудий узоқ йиллар Жомбойда муфтилик қилган. Набиралари берган маълумотга қараганда, у кишининг Ёмини маҳалласидаги ҳовлисида бир нечта от, файтун, хизматкорлар бўлган. Ҳафтанинг шанба ва чоршанда кунлари икки кишилик файтунга оқ от қўшиб муфтилик вазифасини ижро этишга йўл олган...

У пайтларда, яъни асrimiz бошида Жомбой туманига Булунғур, Фаллаорол, Бахмал туманларининг катта қисми тобе бўлган. Чунки, шанба ва чоршанба кунлари ўша қишлоқлардан ҳам талай кишилар келиб, муфти жанобларини кутиб ўтиришаркан.

Беҳбудий бу ерда иш бошлаганида қозихона йўқлиги сабабли қози Абдумажид Юнус ўғли фуқароларнинг ишини асосан уйида кўраркан. Янги муфти (яъни Беҳбудий – Н.К.) анча саъай-ҳаракатлар билан бу юмушни масжидга кўчирган экан.

Маҳмудхўжа Беҳбудий у ёки бу масалада фатволар бериш билан бирга қозилик ҳужжатларини кўздан кечирапкан, вақф, меросга оид масалаларни адолатли ҳал қиларкан”.

Нусрат Раҳматнинг “Беҳбудий муфти либосида” деб номланган мақоласида олға сурилган фикрга кўра, гўё муфтиларнинг, масалан, қозилардан фарқли ўлароқ, маҳсус либоси бўлган. У Беҳбудийнинг, назаримизда, муфтиликка бирор алоқаси бўлмаган либосдаги суратинии эълон қилиб, қўйидаги

сўзларни ёзган: “Туркистон жадидларининг отаси, ўзбек драматургияси ва публицистикасининг асосчиси бу суратни ўлимидан бир йил аввал - 1918 йили олдирган. Мутахассисларнинг изоҳ беришларича, у кишининг белидаги кумуш камар муфтилик нишонасидир”<sup>1</sup>.

Нусрат Раҳматнинг бошқа бир мақоласида муфти Беҳбудий қиёфасини очувчи ғаройиб бир воқеа нақл қилинган. Унинг замондошларидан эшитишига қараганда, Жомбойда бир от ўғриси бўлган экан. У Бахмал тоғларидан ошиб ўтиб, Панжикент қишлоқларидан от ўғирлаб келар ва ўғирланган отларни Самарқанд бозорига олиб бориб сотар экан. Аммо у ўзи истиқомат қилаётган жойда бундай жиноий ишларни зинҳорбазинҳор қилмас экан. Кунларнинг бирида у ўғирлаб келаётган от нобоп чиқиб, “юр” деганда юрмай, ўғрининг жонини ҳалқумига келтирибди. Шу пайт у бир чорбоғда оппоқ отнинг боғлаб қўйилганини кўриб қолибди. Бояги қирчанғини унинг ўрнига боғлаб, оппоқ отни миниб кетибди-да, Самарқанд яқинидаги Тагитепа қишлоқлик танишининг уйида қолдирибди. Аммо жиноят фош бўлиб, узоқ суриштиришлардан сўнг, қози ўғрининг қўлинини кесиш ҳақида ҳукм чиқарибди. Аммо Беҳбудий Жомбойнинг муфтиси сифатида қозининг шундай даҳшатли ҳукм чиқарганига эътиroz билдирибди.

- Эҳтимол, хабарингиз йўқдир. Яқинда бу жазо бекор қилинди, - дебди у қозига ётиғи билан.

Ҳукмнинг бекор қилиниши ўз обрўсига соя ташлаши мумкинлигини сезган қози Қуръоннинг “Моида” сурасининг 38-оятини очиб, ўқиб беради. Бу оядта эса: «Ўғри эркакни ҳам, ўғри аёлни ҳам қилмишларига жазо бўлсин учун, Оллоҳ томонидан азоб бўлсин учун қўлларини кесинглар”, деган сўзлар ёзилган экан.

- Буни бекор қилиш мумкинми? – деб сўрайди қози.

Беҳбудий агар ўғрининг қўллари кесилса, биринчидан, унинг маҳалла-қўйдаги, қариндош-уруғлари ўртасидаги обрўси

<sup>1</sup> “Ўзбекистон адабиёти ва санъати”, 2002 йил 30 август.

йўқолибина қолмай, уларнинг ғазаб ва нафратига дучор бўлиши, иккинчидан, унинг меҳнат билан шуғулланиш имконига эга бўлмаслиги, ҳатто ўз-ўзига хизмат қила олмаслиги ва оиласи аъзоларига тирик товон бўлиб қолиши мумкинлигини эътиборга олиб, жазонинг енгилроқ бўлишини истайди ва қозига Қуръоннинг “Нисо” сурасидаги 90-оятни кўрсатиб, дейди: “Оллоҳ аф этгувчи, маҳфират қилгувчи бўлган зотдир”.

Қози Беҳбудийнинг бу сўзларидан кейин ҳукмнинг бекор қилинишига рози бўлади.

Бу воқеа Беҳбудийнинг муфтилик фаолияти давомида бева-бечораларгина эмас, балки шароит тақозоси билан жиноят йўлига кириб қолган кишиларга ҳам раҳм-шафқат ва мурувват кўрсатганидан, инсонпарвар муфти сифатида иш юритганидан шаҳодат беради.

Бошқа шаҳарларда бўлганидек, Самарқандда ҳам аҳли уламо янги усул мактабларининг очилишига қаттиқ қаршилик кўрсатган. 1914 йил 3 январь куни Улуғбек мадрасасида юз берган ҳодиса даҳшатли оқибатларга олиб келиши мумкин эди. Шу куни жоме масжидида ўқилган жума намозидан сўнг муаззин беш-олти минг мусулмон ҳузурида нутқ сўзлаб, усули жадид ва рус-тузем мактабларида ўқиши тарғиб қилаётган кишиларни коғир, деб эълон қиласиди. Муаззин бундай ғайришаръий ҳукмни эълон қилиш билангина кифояланмай, фарзандларини жадид мактабларига ўқишига берган оталар ҳам куфр йўлига кирганлари сабабли уларнинг хотинлари талоқ бўлишини жамоага маълум қиласиди. Аҳли уламонинг буйруғи сифатида эълон қилинган бу хабар бутун Туркистонга тарқалиб, жадидлар ҳаёти ва жадид мактаблари тақдири катта хавф остида қолади. Шундай қалтис вазиятда жадидларни Куръон суралари ва шариат қонун-қоидалари берган имкониятдан келиб чиқиб ҳимоя қилиш лозим эди. Ўз олдида фавқулодда масъулиятли вазифа турганини сезган муфти Маҳмудхўда Беҳбудий масалани ниҳоятда вазминлик ва маҳорат билан ҳал қиласиди. Муаззин ва унинг орқасида турган кишилар мустамлакачилар маъмуриятининг Самарқанд

вилоятидаги маҳкамасига чақирилади. Вазиятнинг ўзлари учун хатарли бўлганини яхши тушунган муаззин ва унинг ҳаммаслаклари, мусулмонлар жамоасига ҳеч қандай даъват билан мурожаат этмаган кишилардек, қилган ишлари-ю айтган сўзларидан тонадилар.

Шу ерда Ҳожи Муиннинг Беҳбудий инсоний сажиясини англашимизга ёрдам берадиган қуйидаги сўзларини келтириш ўринлидир: "Беҳбудий афанди, - деб ёзади у, - шахсий душманликни хоҳламас ва ҳеч кимнинг шахсига ва шахсий ишларига тил етқузмас эди. Ўшандоқ ўзини такfir ва таҳқир этатурғон хасбм (ракиб) лариға-да қарши ёмон ва ҳақоратомуз сўзлар сўзламас эди. Балки шундай сўзларни эшитганда: "Зотан, мундан дин ва дунёдан хабарсиз кишилардан яхши сўзлар-да кутмак абасдур", - деб кулар эди... Беҳбудий афандида яна бир хусусият бор эдики, хасм ва душманлари анинг кетиндан ҳар қанча ҳақорат этсалар-да, анинг хузурига ўтурғонда ҳеч бир беҳуда сўз айта олмасдан, анга тамлиқ ва мадора этарға мажбур бўлалар эди"<sup>1</sup>.

Юқорида қайд этилган ҳодисада ҳам худди шундай ҳол содир бўлди. Рақиблар Беҳбудий хузурида на жадидларнинг ва на унинг ўзининг шаънига бирор нолойик сўзни айтишга журъат этмадилар.

Мутаассиб кимсалар танобини тортиб қўйиш учун Беҳбудийда обрў ҳам, билим ҳам, иРОДА ҳам етарли эди.

## Ҳаж сафари

Ўрта Осиёда ислом дини ҳукмрон мафкура ўлароқ шаклланган вақтдан бошлаб ватандошларимиз ҳаж сафарига бориб, мусулмон оламининг муқаддас қадамжоларни зиёрат қилиб келадилар. Кўпинча бу сафарлар фақат диний эътиқод белгиси сифатида идрок этилиб келган. Аммо бундай сафарлар

---

<sup>1</sup> Ҳожи Муин. Танланган асарлар. – Б. 30-31.

ватандошларимизнинг мусулмон фарзанди сифатидаги бурчларини бажаришга имкон беригина эқолмай, улар дунёқарашининг кенгайишига ҳам катта таъсир кўрсатган.

Беҳбудий муфти лавозимида хизмат қиласар экан, XX асрнинг сўнгги йилларида мусулмон оламининг муқаддас масканларини зиёрат этишни ихтиёр қилиб қолади. Ҳожи Муин Беҳбудийда бундай истакнинг пайдо бўлиш сабабларини изоҳлаб, ёзган: “Беҳбудий афанди 3-4 ёшдаги биринчи (тўнгич) ўғли ўлгани учун жуда хафаланиб, бир ёқдан, қайғусини таскин этмақ, иккинчи ёқдан, адой ҳаж қилмоқ мақсади билан 1317 (1899) йилда ўзининг дўсти бухоролик Ҳожи Бақо билан сафарга чиқди”<sup>2</sup>. Беҳбудийнинг ўзи эса “Ойна” журналининг 1914 йил 31-сонида чоп этилган “Қасди сафар” деган мақолосида ушбу сафар тўғрисида бундай маълумотни берган: “1318 санаи ҳижрияси тавофи Байтуллоҳга Кафказ йўли или Истанбул ва Миср ва Коҳира воситаси-да бориб эдим, муддати сафарим саккиз ойдан зиёда сўзуб эди”<sup>3</sup>.

Беҳбудийнинг бу эътирофидан маълум бўлишича, у биринчи ҳорижий сафарига 1317 йилда эмас, балки 1318 йилда борган.

Адиб “Ойна” журналининг ўша йилги 34-сонида босилган иккинчи сафари хотираларида эса қуйидаги маълумотни берган: “29 май 1914 сана 17 ражаб ул-муражжаб 1332 санаи ҳижрия, панжшанба куни, кеч соат 7, қатор (поезд) имиз маҳбуб ватаним Самарқанддан ҳаракат этди. Ўғлум Масъудхўжа манглайидан шафқат бўсаси олиб айрилдук. Оҳ, видои оила, ватандан чиқмоқ нақадар мушкул! Бу мушкулотдан қутулмоқ учун инсонни ўлуб ва андан чиқмоғи келур»<sup>1</sup>.

Беҳбудий саккиз ой давом этган биринчи ҳорижий сафари вақтида Туркия ва Мисрнинг кўпгина машҳур шаҳарларида бўлиб, шу шаҳарлар ва уларда истиқомат қилган аҳолининг

<sup>2</sup> Ўша асар. – Б. 22.

<sup>3</sup> *Беҳбудий Махмудхўжа*. Танланган асарлар. – Тошкент: Маънавият, 1999. – Б. 54.

<sup>1</sup> Ўша асар. – Б. 56.

ижтимоий, иқтисодий ва маданий ҳаёти билан яқиндан танишади. Ўз навбатида, мазкур сафар Беҳбудий шуури ва дунёқарашига янги давр ғояларининг шиддат билан кириб келишида муҳим омил бўлади.

Афсуски, Беҳбудийнинг мақоланавислик фаолияти 1905 йилдан кейин бошланган ва у мазкур сафари тўғрисида бирор мақола ёзиб қолдирмаган. Аммо шунга қарамай, биз унинг маърифатпарварлик фаолияти худди шу сафардан кейин бошланганини яхши биламиз. Бу ҳол илк ҳорижий сафарнинг Беҳбудий ҳаётини бутунлай янги ўзанга буриб юборганидан далолат беради.

## Маърифатпарварлик фаолияти

Туркистонда янги усул ёки жадид мактабларининг вужудга келиши XIX аср охири – XX аср бошларига тўғри келади. Мутахассисларнинг фикрларига қараганда, таълим тизимини ислоҳ этиш ғояси Туркистонга Қрим, Қозон ва Озарбайжонга қараганда ўн беш-йигирма йил кейин етиб келган. Бунинг асосий сабаби Туркистон генерал-губернаторлигининг маҳаллий аҳолини маърифатдан онгли равишда четда ушлаб туришга қаратилган сиёсати эди. Маърифатли халқнинг ўз ҳақ-ҳуқуқлари учун, мустамлакачилик зулмидан қутулиш ва миллий озодлик учун кураш бошлиши мумкинлиги Чор Россияси ва унинг Туркистондаги маъмуриятини доим огоҳ бўлиб туришга мажбур этди. Генерал-губернаторликнинг маҳфий хизмати – чор охранкаси ходимлари маҳаллий зиёлиларнинг таълим тизимини ислоҳ қилишга қаратилган ҳар бир қадамини қаттиқ назорат остига олдилар. Ҳатто XIX аср охирида янги усул мактаблари очила бошлагач, Туркистон ўқув округи бўйича маҳсус комиссия тузилди. Мазкур комиссия ўз қарори билан янги усул мактабларининг рухсатсиз тузилишига қатъий чек қўйди. Қарорда, жумладан, бундай моддалар бор эди:

1. Маҳаллий мактаблар чор маъмуриятининг махсус рухсатномаси билан очилади.

2. Маҳаллий мактаблар очиш ва унда ўқитиш сиёсий жиҳатдан тўла ишончли бўлган Россия фуқароларигагина рухсат этилади.

3. Маҳаллий мактабларда фақат Россия цензураси рухсати билан чоп этилган китобларгина ўқитилади.

4. Махсус рухсатсиз мактаб очган шахслар мактаб очиш ва ўқитувчилик қилиш ишидан бир умрга маҳрум этилади...

Янги мактаблар олдига бундай тўсиқлар қўйилганига қарамай, халқнинг фидойи фарзандлари, шу жумладан, Беҳбудий ўтган аср бошларида "усули савтия" (товуш методига асосланган) мактабларни очиш ишига бел боғладилар. Самарқандда очилган дастлабки "усули савтия" мактабларидан бири 1903 йили Жомбой туманининг Ражабамин қишлоғида, атоқли маърифатпарвар Абдуқодир Шакурийнинг ҳовлисида очилган. Бу мактабнинг ташкил этилиши ва фаолият юритишига Беҳбудий ўз ҳиссасини қўшди. Аммо мактаб ўқувчилари орасида шаҳардан қатновчилар оз бўлмаганлиги ва уларнинг Ражабамин қишлоғига қатнашлари қийин бўлгани боис Беҳбудий уни ўз ҳовлисига кўчирди. Шу йилларда у мазкур мактаб ўқувчилари учун "Мунтахаби жуғрофияи умумий" ("Қисқача умумий география"), "Мадҳали жуғрофияи умроний" ("Аҳоли географиясига кириш"), "Мухтасари жуғрофияи Русий" ("Русиянинг қисқача географияси"), "Китобат ул-атфол" ("Болалар китоби"), "Мухтасари тарихи ислом" ("Исломнинг қисқача китоби") сингари дарслик ва ўқув қўлланмаларини яратди. Бу тилга олинган асарларнинг ўзиёқ Беҳбудийнинг ўқувчиларга ҳам диний, ҳам дунёвий билимларни беришни ўз олдига мақсад қилиб қўйган маърифатпарвар бўлганидан далолат беради.

Беҳбудийнинг "Маънавият" нашриёти томонидан чоп этилган "Танланган асарлари" (1999) бизда мазкур ўқув дарслик ва қўлланмаларининг иккитаси тўғрисида муайян тасаввур уйғотади. Булардан бири "Китоб ул-атфол" бўлиб, Беҳбудий

ўқувчилар қадим мактабларда тўрт-беш йил сабоқ олганлариға қарамай, хат ёзиш малакасини ўрганиб чиқа олмаганлари сабабли унда хат ёзиш шартлари ва хат ёзиш маҳорати тўғрисида тасаввур бериб, хат турларига мисоллар келтиради. “Мунтахаби жуғрофияи умумий” китобидан олинган парчаларда эса “жуғрофия” сўзининг маъноси, география фанининг қачон пайдо бўлгани, бу фанни ўрганишнинг аҳамияти, шунингдек, ер юзидағи мамлакатлар тўғрисида маълумот берилган. Бундан ташқари, мазкур дарслиқдан “Эски ва янги донишмандлар”, “Туркистон донишмандлари” деган фасллар ҳам ўрин олган. Муаллиф, масалан, сўнгги фаслларда жаҳон ва Туркистон олимларининг ер юзиинг пайдо бўлиши тўғрисидаги қарашларини келтирган ҳамда ҳарита, глобус сингари жуғрофий буюм ва атамалар тўғрисида тушунчалар берган. Ўз даврида катта илмий-маърифий аҳамиятга эга бўлган бу китоблар Самарқанд шаҳридаги бошқа мактабларда ҳам дарслик ва ўқув қўлланмалари сифатида узоқ йиллар мобайнида хизмат қилиб келган.

Беҳбудий “Самарқанд усули жадид мактабининг имтиҳони хусусинда” деган мақоласида бу дарслик ва ўқув қўлланмаларининг Шакурий мактабида ўқитилганлиги ва ўқувчиларнинг улар асосида имтиҳон берганликлари тўғрисида бундай ёзган: “Бизни “Мадҳали жуғрофияи умроний” ва “Мухтасари жуғрофияи Русий” китобимиизда Оврупа, Осиё, Африқо, Америқо ва Австралия ҳам Россия мамлакатларини масоҳат (ўлчов), ҳудуд, нуфусларини қадари ва соати ва ҳар бирига неча мамлакат ва ҳукумат борлиғи ва Россия мамлакатини тақсимот ва нуфусларин эски ва янги қитъаларини ҳудуд ва денгизлари ва ер юзидағи ислом, насоро, яхуд ва мажусларни адади муфассал ва ҳифзи билан баён этдилар”<sup>1</sup>.

Ушбу мақолада тасвир этилган имтиҳон пайтида маориф ходимларидан ташқари, маҳаллий ҳукумат номидан Ликошин билан Вяткин, шунингдек, приставлар, савдогарлар ва

---

<sup>1</sup> Туркистон вилоятининг газети, 1906, 27-сон.

дўйондорлар ҳам иштирок этганлар. Икки кун давомда соат 10 дан 6 га қадар давом этган имтиҳон уларда яхши таассурот қолдирган. Уларнинг аксари шогирдлар илмига таҳсинлар айтган бўлса, айримлари ҳатто ҳаяжондан йиғлаб ҳам юборганлар. “Хожи Мавлонбек жаноблари, - деб ёзади Беҳбудий, - олти соат қадар муттасил туриб, болаларни қироат ва илми диндан берган жавобларига йиғлаб, муаллимга 15 сўм ҳадя бердилар”<sup>2</sup>.

Шакурий мактабида Беҳбудийнинг дарслик ва ўқув қўлланмалари асосида берилган билим ва бўлиб ўтган имтиҳон жамият олдида жадид мактабларининг обрў-эътиборини бир мунча кўтардики, бунда, Беҳбудийнинг хизматлари оз эмас эди.

Илм-фанинг бу оташин тарғиботчиси мактаб очиб, дарслик ва ўқув қўлланмаларини ёзиш билангина шуғулланиб қолмай, Туркистон ўлкасининг йирик жамоат арбобларидан бири сифатида 1907 йилда Россия З-Давлат Думасининг Мусулмон фракциясига “Туркистон маданий мухторияти” лойиҳасини кўриб чиқиши учун юборди. Афсуски, З-Давлат Думаси Беҳбудий томонидан ишлаб чиқилган мазкур лойиҳани эътиборсиз қолдирди. Аммо бу ҳол мазкур лойиҳа маъқулланган тақдирда Туркистон ўлкасининг ижтимоий ҳаётига катта таъсир кўрсатган бўлиши мумкинлиги шубҳасиз. Мазкур тарихий ҳужжатни ҳорижий архивлардан топган ватандошимиз доктор Темир Хўжа ўғли у ҳақда бундай сўзларни ёзган: “...бу матн дикқат билан ўрганилса, Беҳбудийнинг Чор Россияси қарамоғида Туркистонда яшаётган туркистонликлар учун (Бухоро амирлиги ва Хива хонлиги бунга кирмайди) ўз даврига кўра ғоят жасоратли, кенг хуқуқлар талаб этувчи мухторият истагани маълум бўлади. Таклифномадаги энг муҳим икки мавзунинг бири мактабларининг хусусийлаштирилиши (18-модда), иккинчиси эса Россия Давлат Думасининг Туркистоннинг ички ишларига аралашмаслиги лозимлиги билан боғлиқ моддалардир”<sup>3</sup>.

Беҳбудий З-Давлат Думасининг Мусулмон фракциясига

---

<sup>2</sup> Ўша ерда.

<sup>3</sup> Жаҳон адабиёти, 2003 йил август сони. – Б. 148.

тақдим этган “лойиҳа”да “Умумий мактаблар” деган фасл ҳам бор бўлиб, унда қуидаги масалалар қонуний кучга эга бўлиши сўралган эди:

“17. Русияга умумий ўқитув масаласи ва моддаси Туркистонни мусовиян (тенглик) муштакил (ўз ичга олган) бўлсун.

18. Туркистон мактаб ва мадрасалари ҳукумат назоратидан озод бўлсун.

19. Умумий олий ва ўрта мақтабиға мусулмонлардан комиссия тайинлансун. Рус ҳарфи мусулман мактаблариға жорий бўлмасун.

20. Ҳар хил корхона, ҳибсхона ва аскархоналарғаки мусулмон бордур, мусулмон руҳонийси тайинлансун”<sup>1</sup>.

“Лойиҳа”нинг бу моддалари Беҳбудийнинг 1907 йилдаёқ ўз олдига маърифатпарварлиқдан истиқлолчилик ҳаракати сари дадил қадам ташлаганидан дарак беради.

Беҳбудий кейинчалик “Ойна” журналини ташкил этиб, ёшларни диний ва дунёвий билимларни эгаллашга, икки эмас, тўрт тилни ўзлаштиришга даъват этувчи мақолалар билан чиқди. Турли сафар таассуротлари асосида туркум мақолалар ёзиб, Шарқ ва, айниқса, Ғарб мамлакатларида кечаётган илмий-маданий юксалиш шу мамлакатларда илм-фанга бўлган катта эътиборнинг натижаси эканини ишонарли далиллар билан асослаб берди.

Миллий уйғониш ҳаракатининг раҳбарларидан бири шу йилларда “Туркистон маданий муҳторяйти”ни амалга ошириш учун таълим тизимини ислоҳ этишнинг ўзигина кифоя қилмайди, деган бирдан-бир тўғри ва дадил хulosага келди.

## “Беҳбудия” кутубхонаси

Миллий маданиятимиз тарихига назар ташланган киши

---

<sup>1</sup> Ўша жойда. – Б. 156-157.

барча маърифатпарвар подшолар саройида кутубхоналар бўлгани ва шу кутубхоналарда ўзбек халқининг тарихи, дини ва маданиятига оид ноёб китоблар сақланганини яхши билади. Аммо бу кутубхоналардан фақат сарой аҳли ва саройга яқин кишиларгина фойдаланиб келганлар. XIX аср охири - XX аср бошларида вужудга келган миллий уйғониш ҳаракати намояндалари эса ўз олдиларига айрим кишиларни эмас, балки халқни маърифатлаштириш мақсадини қўйганлари туфайли янги мактаблар очибина қолмай, кенг халқ оммаси учун кутубхоналарни ҳам барпо этишга киришдилар. Ўтган асрнинг 10-йилларида Тошкентда Мунаввар қори Абдурашидхонов раҳбарлигидаги жадидлар ташаббуси билан “Турон” кутубхонаси ташкил этилди. Бундан бир неча йил илгари эса Самарқандда “Қироатхонаи Беҳбудия” ўз фаолиятини бошлаб юборди.

“Туркистон вилоятининг газети” саҳифаларини вараглаган киши мазкур газетанинг 1908 йилдаги 22 июнь сонида Беҳбудийнинг “Об открытии мусульманской библиотеки-читальни – мутолаахона» сарлавҳали хабар-мақоласини ўқиши мумкин. Бу хабардан маълум бўлишича, Беҳбудий Самарқандда мутолаахона очиш мақсадида “ўн икки нафар муҳтарам кишилар” – маслақдошлари билан бирга 27 “боб”дан иборат дастур ва низом (устав) тузиб, Самарқанд шаҳрининг ҳарбий губернаторига йўллаган экан. Мазкур дастур ва низом тасдиқлангач, мутолаахонанинг моддий жиҳатларини “мустаҳкамлаш ишлари” юришиб кетади. Аввало мутолаани ташкил этиш учун маҳсус жамият тузилади. Жамият аъзоларининг Беҳбудий бошчилигидаги биринчи йиғилишида мутолаахона хизматчилари таркиби аниқлаб олинади. Беҳбудий жамият раиси, Ҳожиқул Муҳамедов раис ўринбосари, таржимон Қўқонбой Абдухолик ўғли саркотиб, муаллим Хидирбек Абусайд ўғли раиснинг майший ишлар бўйича ўринбосари, савдогар мулла Абдусалом Абдулмўмин ўғли хазиначи, муаллим Абдуқодир Абдулшакур ўғли (Абдуқодир Шакурий) ва Ҳожи Сайд Аҳмад Хўжа Хабар ўғли идоранинг доимий аъзолари этиб

сайланадилар. Ушбу хабардан маълум бўлишича, жамият аъзолари мутолаҳонани ўша йилнинг рамазони шарифга қадар очишга сўз берганлар.

Хуллас, мазкур йиғилишда баён қилинган фикр ва мулоҳазалар асосида тузилган қарор (қонуннома) ҳарбий губернатор генерал-майор Галкинга тақдим этилади ва у қарорниг асл нусхаси тагига имзо чекиб, мутолаҳонанинг очилишига ижозат беради. Шундан кейин мутолаахона 1908 йил 11 сентябрда расман очилади. Очилиш маросимида жадид мактаби талабаларининг бир гуруҳи иштирок этиб, саловот ўқийди. Сўнгра шаҳарнинг юздан зиёд тараққийпарвар кишилари хатми Куръон қиласидилар.

Кейинчалик “Беҳбудия” кутубхонаси номи билан машхур бўлган мутолаахона икки сменада (эрталаб соат 9 дан 5 гача ва соат 6 дан 12 гача) ишлаб, 60 дан 110 нафаргача бўлган кишиларга маданий хизмат кўрсата бошлиди. Беҳбудийнинг «Самарқанд кутубхона исломияси» (“Туркистон вилоятининг газети”, 1908 йил, ноябрь) деган мақоласидан маълум бўлишича, кутубхона жамғармасида тўплланган китоб ва рисолалар ўша кезларда 600 та, газета ва журналлар эса ундан ҳам кўп бўлган. Беҳбудий агар пул кўпайса, диний ва дунёвий китобларнинг янада кўпроқ сотиб олиш, Истанбул ва Коҳирада нашр этилаётган газета ва журналларга эса обуна бўлиш мумкинлигини айтган.

“Туркистон вилоятининг газети” қарийб ҳар бир сонида китоб сотиб олиб ўқиши имконига эга бўлмаган кишиларда кутубхонага қизиқишинг тобора ортиб бораётгани ҳақида хабар бериб борган. Газетанинг 1909 йил 15 январь сонида берилган маълумотга қараганда, 2000 нафарга яқин кишилар кутубхонадаги адабиёт ва матбуот асарларидан баҳраманд бўлганлар.

Беҳбудий кутубхонанинг ташкилотчисигина эмас, балки ундан ўрин олган аксар китоб ва рисолларнинг эгаси ҳам эди. Вадуд Махмуд Абдуқодир Шакурийга бағишиланган мақоласида: “Беҳбудий бой кутубхонанинг эгаси эди. 1000 жилдлик китоб

фондига эга бўлган бу мутолаахона барча учун доимо очиқ эди. Ўша вақтларда бу китобларнинг ҳар бири олтин баҳосида ҳисобланарди. Беҳбудий бу жойнинг биноси ва бошқа харажатларини ўз чўнтағидан тўлар эди”<sup>1</sup>, деб ёзган.

Кутубхонага бўлган эътиборнинг ошиши кейинчалик унда китоб савдоси билан шуғулланиш имконини ҳам яратди. Беҳбудий самарқандлик тараққийпарвар кишиларнинг хорижда нашр этилган ва нашр этилаётган китобларга бўлган қизиқишлирини ва уларнинг илтимосларини эътиборга олиб, Кавказ, Қрим, Туркия ва бошқа мамлакатларга саёҳатга борганида, у ердан кутубхона учун китоблар, “Ойна” журнали учун эса клишелар олиб келишга аҳд қилди. У “Қасди сафар” сарлавҳаси мақоласида шу ҳақида бундай деб ёзган эди: “Кутубхонаи Беҳбудия” исминда “Ойна” идорасина китоб савдоси очмоқ учун рухсат олинган. Истанбул, Миср, Қрим, Кафказ, Қозон, Ўрунбург, Ҳиндистон китоблариндан келтирмоқ керак. “Ойна”да қўймоқ учун Русия ва хорижиянинг машҳур иморат ва манзара акобирларининг расм ва суратлари, илмий ва фанний мақолалар учун фанний ва тарихий нақшларни қолиб-клишеси лозим...”<sup>2</sup>.

Беҳбудий 1914 йил 29 май куни бошланган катта саёҳати давомида Кавказ, Қрим, Туркия, Греция, Болгария, Австрия ва Германиянинг турли шаҳарларида бўлади ва бу шаҳарлардан “Беҳбудия” кутубхонаси учун жуда кўп китоб ва рисолаларни олиб келади.

Афсуски, “Беҳбудия” кутубхонасининг 1917 йилдаги инқилобий воқеалардан кейинги тақдирни хусусида матбуотда бирор мақола ёки хотира эълон қилинмаган.

## Исмоил Гаспринский ва Беҳбудий

---

<sup>1</sup> Кўчирма филология фанлари номзоди З.Ахророванинг “Беҳбудий” кутубхонаси” мақоласидан олинди, - Ўзбекистон адабиёти ва санъати, 1995 йил 17 февраль.

<sup>2</sup> Беҳбудий М. Танланган асарлар. – Б. 24.

Боғчасаройда И smoил Гаспринский томонидан “Таржимон” газетасининг нашр этилиши ва бу газетанинг Туркистонда тарқала бошлиши ўлканинг маданий-маърифий ҳаётига катта таъсир кўрсатди. Ўз газетасининг Туркистонда тарқалишидан манфаатдор бўлган боғчасаройлик маърифатпарвар ҳам 1893 ва 1897 йилларда Туркистонга келади. Айrim адабиётшуносларнинг тахмин қилишларича, “барча нарсага қизиқувчи” Беҳбудийнинг шу йилларда Гаспринский билан учрашмаган бўлиши мумкин эмас.

Беҳбудий Туркистон ўлкасига момагулдирак ўлароқ акс-садо билан кириб келган “Таржимон” газетаси ва унинг муҳаррири билан қачон ва қаерда танишган? Афсуски, бу саволга бирорта ўзбек адабиётшуноси, шу жумладан, “И smoил Гаспринский ва Туркистон” мақолалар тўпламида (2005) “И smoил Гаспринский ва Махмудхўжа Беҳбудий” мақоласи билан қатнашган таниқли адабиётшунос Бегали Қосимов ҳам аниқ жавоб бермаган ва бундай вазифани ўз олдига қўймаган. Беҳбудийнинг Гаспринскийга бағишлиланган бир хотира ва бир марсия-мақоласида ҳам бу масалага ойдинлик кирита оловчичи бирорта шама йўқ. Бироқ Беҳбудийнинг биринчи библиографи Ҳожи Муиннинг устоз ҳақидаги мақолаларида баъзи бир фикрлар борки, қуйида улар билан танишиш масаланинг бир оз ёруғлик касб этишига имкон туғдиради.

Ҳожи Муин “Учқун” журналининг 1923 йил 1-сонида эълон қилинган “Махмудхўжа Беҳбудий” мақоласида бундай ёзган:

“Хижоз сафаридан кейин Беҳбудий афанди Боғчасаройда чиқа турғон “Таржимон”<sup>1</sup> газетасини олдириб ўқий бошлади. Иккинчи томондан, турлик фанний, илмий китобларнинг мутолааси билан маълумотини кенгайтира берди.

---

<sup>1</sup> Самарқандда ерлик мусулмонлардан бошлаб 1892 йилда “Таржимон” газетасини олдириуб ўқуғон киши Ҳожи Абдуқодир (меъмор) бўлиб, ундан кейин Хўқандбой Абдухолик ўғли, ундан сўнг татарлардан Бадриддин афанди, дерлар. Беҳбудийдан илгари Самарқандда ёлғуз З нафаргина газета ўқигувчи бор эмиш. (Ҳожи Муин изоҳи.)

Беҳбудий афанди ҳаж сафаридан бурун бир неча йил қозихона ва ҳукумат идоралариға келмақда бўлғон миссионер Остроумовнинг “Туркистон вилоятининг газети”ни ўқуб юрган бўлса-да, бу газета унинг фикрини очмайди. Балки “Таржимон”ни ўқий бошлиғондан сўнг фикри очилиб, “Туркистон” газетасининг мусулмонларни ағфол этиш мақсади билан ёза турғон сўзларини тушуна бошлайди ва ўзиға учрағон ёру дўстларини мустабид ҳукуматнинг бузуқ мақсадидан огоҳлантиради. Ҳар вақт ва ҳар ерда йўлуққан ва мусоҳиб бўлғон ошноларини саёҳатга тарғиб ва газета ўқишға ташвиқ этиб юрди. Шу билан баробар аларға ўзи ўқуб чиққан газеталарни тарқатди”<sup>2</sup>.

Ҳожи Муиннинг бу сўзларига таянган ҳолда айтиш мумкинки, Беҳбудий “Таржимон” газетасини “ҳижоз сафари”дан, яъни 1899 йилдан кейингина “олдириб ўқий бошлаган”. Бинобарин, у шу вақтга қадар Гаспринский билан шахсан таниш бўлмаган ва ҳатто унинг “Таржимон” газетасини ўқимаган.

Ҳожи Муиннинг юқорида келтирилган сўзлари биз учун яна шу жиҳати билан муҳимки, муаллиф унда Беҳбудийнинг “Таржимон” газетасини ўқий бошлагандан кейингина кўзи очилгани ва миссионер Остроумов муҳаррирлик қилган газетанинг асл моҳиятини тушуниб, ундан юз ўғирганини тўғри қайд этган. Беҳбудий замондоши ва яқин свфдошининг бу сўзлари адаб дунёқарашининг ўзгариши ва янги маъно касб этишида Гаспринскийнинг таъсири ғоят катта бўлганини тасдиқлади.

Ҳожи Муин “Зарафшон” газетасининг 1923 йил 25 март сонида босилган бошқа бир мақоласида “Таржимон” газетасининг Беҳбудийга кўрсатган таъсири тўғрисидаги фикрларини такрорлагандан сўнг, бундай ёзган: “5-йил ўзгаришидан кейин Русия ва Туркистонда турлик миллий газета ва журналлар чиқа бошлади. Беҳбудий бу газеталарнинг кўбисида ҳар мавзуда мақолалар ёзуб, халққа раҳбарлик этар эди. Дума ва сайлов масаласи қўзғалғонда шул мавзуга оид керак

<sup>2</sup> Ҳожи Муин. Танланган асарлар. – Б. 22-23.

оғзаки ва керак матбуот орқали халққа фойдалик маълумот ва таълимот бериб турди. 1321 (1903) йилда Самарқандда янги мактаблар очила бошлағоч, Беҳбудий афанди, бир ёқдан, халқни мактаб ва маорифға ташвиқ этганидек, иккинчи ёқдан, бу мактабларда она тилимизда китоблар йўқлигини кўзда тутуб, мактаб учун форсча ва ўзбекча турлик китоблар ёзди ва уларни ўз маорифи билан босиб тарқатди. Биринчи мартаба ўз тилимизда харита ва тиётр рисоласи ёзуб, табъ ва нашр этди”<sup>2</sup>.

Ҳожи Муиннинг бу сўzlари Гаспринский газетасининг Беҳбудий дунёқараши ва ижтимоий-педагогик фаолиятига кўрсатган таъсири масаласига янада аниқлик киритади. Шу билан бирга биз ҳали тўхтаб ултурмаган масалага ҳам эътиборни жалб этадики, бу. “Беҳбудия” нашриётининг ташкил этилиши билан боғлиқ масаладир. Гап шундаки, Беҳбудий “Самарқанд” газетаси ва “Ойна” журналини нашр этишга киришган кезларда (1913 йил) “Беҳбудия” нашриётини ҳам очиб, Фитратнинг “Баёноти сайёҳи ҳинди” асарини рус тилига таржима қилдириб (таржимон Ягелло), нашр этган. Шу билан бирга ўзбек тилида тарихда биринчи марта Туркистон ўлкасининг харитасини чоп этган.

Шубҳасиз, Беҳбудий олиб борган бу ишларнинг ҳаммасини Гаспринский номи билан боғлаш тўғри бўлмайди. Зоро, Беҳбудий фаолиятининг кўлами, билим доираси ва дунёқарашининг кенглиги билан Гаспринский қаршисида тик турувчи шогирдлардан эмас.

Яна Ҳожи Муиннинг “Танланган асарлари”ни мутолаа қилишда давом этсак, бизни қизиқтирган қуйидаги сўzlарга кўзимиз тушади: “Бир вақт (1908 йилда), - деб ёзади у, - “Таржимон” газетасининг муҳаррири Исмоилбек афанди Гаспринский (25 йиллик<sup>1</sup> юбилейидан сўнг) Самарқандға келганида, Беҳбудий афанди йиғлағон ҳолда ул зот ила кучоқлшиб кўрушуб: “Бу кун сизнинг хузурингизга келиб

---

<sup>3</sup> Ўша асар. – Б. 26-27.

<sup>1</sup> 25 йиллик эмас, балки 55 йиллик.

сұхбатингиздан истифода қила турғон зиёлиларимиз йўқ”, - деди. Исмоилбек афанди анга жавобан: “Беҳбудий афанди! Йиғламанг! (Мажлисдаги кишиларга ишора қилиб.) Мана булар озми? Яна сизлар тиришсангиз, оз бир фурсатда миллатга кераклик кўб одамлар етирдира олурсиз”, - деди”<sup>2</sup>.

Бу сўзлардан маълум бўлишича, Боғчасаройда 55 йиллик юбилей тантаналари ўтгандан сўнг, Гаспринский Самарқандга келиб, Беҳбудий ва унинг маслақдош биродарлари билан учрашган.

“Миллий уйғониш даври ўзбек адабиёти” дарслиги муаллифлари шу ҳақда бундай ёзганлар:

“Исмоилбекнинг Туркистонга иккинчи сафари 1908 йилга тўғри келади. Сафар тафсилотлари “Бухорода не кўрдим?” сарлавҳаси остида “Таржимон”нинг ўша йил сонларида (47, 50, 57-59, 64, 78) босилган. Каспийдан “Генерал Скобелев” кемасида келиб, Красноводскдан поездга ўтаркан, Кўктепа урушини эслайди. Қалъа аҳолисининг “бутун Осиёга шуҳрат ва ибрат дея бола-чақаси баробар қиличдан кечурулуб, от оёғида топталганини алам ва изтироб ила ёдга олади. Исмоилбекни Янги Бухоро (Когон) станциясида амир одамлари ва Русия сиёсий агентлиги таржимони Мирҳайдарбек кутиб оладилар. Амир одамлари уни Карманага таклиф этади. Зиёфат асносида валиаҳд Сайид Олимхон билан учрашади. Валиаҳднинг Русия матбуотини мунтазам ўқиб боришини, дунё воқеаларидан хабардорлигини кўради. Самарқандга ўтади. “Усули жадид” мактаблари билан танишади. Маҳмудхўжа Беҳбудий, Абдуқодир Шакурий билан узоқ сұхбатлар қуради. Гап тарих ва келажак, муқаддас обидалар ва уларнинг тақдири, рус истилочилик сиёсати ва ўзликни сақлаб қолиш ҳақида эди”<sup>1</sup>.

Дарслиқдаги бу сўзлар Гаспринскийнинг Туркистонга иккинчи марта 1907 йилда келганлиги ҳақидаги маълумотнини

---

<sup>2</sup> Ўша асар. – Б. 30.

<sup>1</sup> Миллий уйғониш даври ўзбек адабиёти, - Тошкент: Маънавият, 2004.  
– Б. 240-241.

нотўғри эканини кўрсатади.

Яқинда Истанбулда нашр этилган И.Гаспринский асарларининг III жилдида “Бухорода не кўрдим” сарлавҳали хотира ҳам эълон қилинган бўлиб, муаллиф унда самарқандлик дўстлари билан бўлиб ўтган учрашувларини бундай хотирлаган:

“Самарқанднинг усули жадид мактаби мунтазам характерли дастур ва идора усулига эга. Катта муаллим Абдуқодир афанди Шакурий мактаб интизоми ва ривожи учун унинг оддий бир ходимигина эмас, балки фидойиси бўлиб хизмат қиласи. Зиёли уламолардан Маҳмудхўда Беҳбудий жаноблари мактаб бунёд этилгандан бери ҳиммат кўрсатиб келаётир. Муаллим Абдуқодир Абдушакурий афанди усуви савтия ва низомни ўрганиш (фонетик усулни қўллаш ва ва ўқув ишларини йўлга қўйиш) мақсадида “Таржимон” идораси билан келишилган ҳолда бошқа жойларда очилган усули савтия мактабларини зиёрат қилиб, эзгу ният ва истаклар ила касбий маълумот олган. Самарқандда муқим яшайдиган ушбу кўзи очиқ муаллимга россиялик нўғон тужжорлар томонидан кўрсатилан моддий ёрдамни катта мамнуният ила эшитдик. Шундай бўлмоғи керак. Ҳам диннинг, ҳам замонанинг фарзларидан ҳисобланади бу.

Мактабнинг юзтacha толиби ва учта муаллими бор. Дастурида туркча, форсча ва арабчанинг бошланғич дарслари, дин илми, жўғрофия ва тарих мавжуд. Оҳангини келиштириб муножот, шеър ўқиши мактабга хос бўлган усул. Кичкинтой шогирд ўқувчиларни кўздан кечирдик. Яхши тарбия олганликлари, дарсларни аъзога бажаришлари ўзларини тутишларида, кўзларида акс этган нур ва жасоратда зухур этарди.

Хожа Маҳмуд муфти яна шундай мактабни очишни ўйларди. Маориф учун хизмат қилаётган Самарқанд аҳли хайр-эҳсон жамияти ва ҳалқ учун ўқиши жойларига рухсат ва имтиёз олиб, ионалар тўплашга киришган эди. Каминанинг хотири учун унга “Исмоилия” номи берилар эмиш. Замонавий илмларнинг мазаси бу ерларда ҳам ҳисобланади.

Самарқанд гимназиясидан маҳаллий битта ва Русиядан келган турклардан олти нафар талаба (таҳсилда) давом қилаётган экан. Маҳаллий халқдан бир “участка пристави” (кичик мавзе бошқарувчиси) ва яна битта доктор (врач) бор экан. (Буларнинг) ортларидан етишиб келаётганлар янада чўх бўлсин, кўп бўлсин”<sup>2</sup>.

Бу сўзлардан маълум бўлишича, Гаспринский самарқандлик дўйстлари хузурига қилган ташрифи чоғида асосан бошланғич таълим ва тарбия ишлари билан қизиққан ҳамда Беҳбудий ва Шакурийнинг бу соҳада олиб борган ишларидан мамнун бўлган.

Кўрамизки, Гаспринский хотираларидан келтирилган ва дарслиқдан ўрин олган лавҳа ҳам, Ҳожи Муин томонидан берилган маълумот ҳам (мухтасар шаклда ифодаланганига қарамай), икки улкан маърифатпарвар ўртасидаги ўзаро алоқа ҳақида аниқ тасаввур беради.

Шундай қилиб, Беҳбудий Гаспринский билан 1908 йилда Самарқандда учрашган. Агар Ҳожи Муин тасвиридаги икки аллома учрашувини яна бир бор кўз олдимииздан ўтказсан, унинг биринчи учрашув бўлмаганлиги кундек равshan бўлади.

### **Истанбул шаҳридаги учрашув**

Туркистонда миллий уйғониш ҳаракатининг жунбушга келиши ва шу ҳаракатнинг муҳим бир қисми – янги усул мактабларини очиш ғоясининг кенг тарқалишида И smoil Гаспринскийнинг хизматлари оз эмас. Мустамлакачилик шароитида Россия ҳудудларида яшаган барча туркий халқларни мудроқ ҳолатдан уйғотишни, уларни маърифат ёрдамида миллий тараққиёт сари етаклашни ўз олдига мақсад қилиб қўйган Гаспринский ва унинг “Таржимон” газетаси билан яқиндан танишиш Беҳбудийнинг Туркистон жадидларининг раҳбари даражасига кўтарилишида муайян аҳамиятга молик бўлди.

Биз масаланинг шу томонини эътиборга олиб, қуйида икки

---

<sup>2</sup> Gasprali Ismail. Cechilmish Eserleri, III. – Istanbul, 2008. - Б. 436-438.

алломанинг Истанбул шаҳридаги учрашувига алоҳида тўхтаб ўтмоқчимиз. Учрашув тафсилотлари Беҳбудий қалами билан ёзилгани ва “Ойна” журнали (1914 йил, 49-сон) да эълон қилингани туфайли бизнинг ишимиз бир қадар енгиллашади ва биз Беҳбудий ҳикоясини ҳозирги ўзбек тилида мухтасар бир шаклда ифодалашга ҳаракат қиласиз.

...1914 йил 20 июнь. Аср вақти. Беҳбудий марғилонлик мударрис ҳамроҳи билан бирга Истанбул шаҳридаги Гулхона боғининг салқин хиёбонида сұхбатлашиб бораарди. Олдинда кетаётган икки киши ҳаддан зиёд сокин одим ташлаб бораётгани учун Беҳбудий бир қўлини кўксига қўйиб, уларга салом бераётган кишидек ҳамроҳи билан тез юриб, улардан ўзиб кетади. Бегона кишилардан бири бошига барра қорақўл телпак кийган татар, иккинчиси эса фаслик турк эди. Беҳбудий бу икки кишидан бири Гаспринский, иккинчиси эса Ҳамдуллоҳ Субҳибек эмасмикан, деган хаёлга боради. Беҳбудий ҳали ўн қадам ҳам юрмаган эди, орқадан: “Ай, хожа!” деган таниш овоз эшитилади. Бу овозни эшитиши билан Беҳбудийнинг юраги гурс-гурс уриб, ўша заҳоти орқага ўгирилади. Унинг қархисида боғчасаройлик буюк маърифатпарвар турарди.

Ҳамдуллоҳ Субҳибек Беҳбудийни орқасидан таниб қолиб, Гаспринскийга у ҳақда сўзлаб улгурган эди. Дўстлар бир-бирларига қучоқ очиб кўришадилар. Сўнгра Гаспринский Беҳбудийнинг бошидан-оёғига қадар назар ташлаб, хитоб қиласиди:

- Не учун бу қадар кексаймоқ?!

Беҳбудий бу кутилмаган саволга муносиб жавоб қайтаради:

- Не учун бу қадар ориғламоқ?!

Дўстлар беихтиёр кулиб юборадилар.

Беҳбудий шу куннинг эртасига Шом ва Мисрга сафарга кетажагини айтгач, Гаспринский: “Ундей бўлса, сұхбат этайлик”, - деб ҳамроҳига жавоб беради. Беҳбудий ҳам мударрис билан хайрлашади. Дўстлар боғдан чиқиб, аравада Шоҳин Пошо меҳмонхонасига етиб келадилар. Таом буюрган бўлишларига

қарамай, ҳар иккала мунаvvар таомни унутиб, суҳбат денгизига ғарқ бўладилар. Гаспринский ҳар уч-тўрт дақиқада енгил йўталиб турганига қарамай, “Русиядан, Туркистондан, умум олами исломдан, дунёдан сўйлайди”, “мусулмонларни кундан-кун тараққий этишини сўйлаб”, хурсанд бўлади. Сўнгра:

- Энди сиз сўйланг, азизим Маҳмудхўжа, - деб сўз навбатини Беҳбудийга беради.

Беҳбудий “Самарқанд, Бухоро, Тошканд, Хива, Фарғона, хулоса, ҳар биридан сўйлайди”.

- Оллоҳга шукур, - дейди Гаспринский дўстининг сўзларини тинглаб бўлгач, - туркистонлик қардошлар болаларини ҳукумат мактабларига ўқишга бера бошлабдилар. Бугун икки газета ва бир журналингиз бор. Мактабларингиз ҳам бир оз тараққий этмоқда. Ҳукумат мактабларига кўпроқ бола берингиз. Рус маданиятидан қочмангиз. Оҳ, билмайман, Бухоро на бўлур?..

- Афандим, - жавоб беради Беҳбудий, - Бухорони ҳукуматимиз, яъни Россия тарбия қилмагунча ундан бирор нарсани умид қилиб бўлмас.

- Ҳа, тўғри, охир-оқибат шундай бўлмоғи лозим, - дейди Гаспринский ўксиниб.

Сўз бошқа мавзуга кўчади. Беҳбудий бир неча маротаба: “Сиз ҳазратлари энди истироҳат қилингиз”, деб кетишга рухсат сўрайди. Лекин Гаспринский самарқандлик дўстининг кетишини истамай: “Сиз бу ерда бўлсангиз, мен истироҳат қилгандек бўламан. Агар кетадиган бўлсангиз, хат ёзишга ўтираман», - дейди.

Гаспринский ўша йилнинг февраль ойида Россия Давлат Думаси мусулмон фракциясининг аъзолари билан учрашиш учун Петербургга борганида шамоллаб қолиб, расмий мажлисларда иштирок этолмаган экан. Шунинг учун у агар Истанбулнинг ҳавоси ёқса, бу ерда бир мунча вақт турмоқчи, сўнгра, Оллоҳ хоҳласа, Коҳирага бориб, баъзи бир ишлар билан шуғулланмоқчи экан.

- Сафардан қайтишингизда Боғчасаройга кириб ўтинг,

автомобилда бирга юриб, сизга Кримни кўрсатаман, - дейди у.

Гаспринский хасталиқдан безовта бўлаётгани сабабли, Беҳбудий изн сўрашига қарамай, караватга чўзилиб, соатлаб сўзлайди. Бир маҳал қарашса, тун яримлаб қолган, улар эса оз эмас – кўп эмас, етти соат суҳбатлашиб ўтиришган экан. Гаспринский шундай кейингина дўстининг кетишига рухсат беради, уни зинага қадар кузатиб ва ундан Боғчасаройга, албатта, келиши ҳақида ваъдан олиб, у билан видолашади.

Беҳбудий қримлик дўсти билан Истанбулда бўлиб ўтган учрашув тафсилотини ҳикоя қилиб бўлгач, 1908 йили Самарқандда бўлиб ўтган учрашувни эслаб, бундай ёзган:

“7 сана муқаддам устод ҳазратлари Самарқандға келиб, муаллим Шакурий ва бизга меҳмон бўлуб эдилар. У замонгидан кўра энди кўп ориғлаб эканлар. Устод ҳазратларини Истанбулда кўрмоқ ва суҳбат этмоқ ҳеч хаёлимга ўтмаган эди. Оллоҳнинг лутфи ила устод ҳазратларининг танҳои 7 соат суҳбатларидан у қадар файз топиб, мамнун қолдимки, айтган ила адо этолмайман ва ул суҳбатнинг лаззати асло мандан кетмайдур. Кошки эртаси Шомға кетмай, устод ҳазратлари ила зиёдароқ суҳбат этса эдим. Оҳ! У устоди комилни энди кўлдан бердук ва олами руҳонийға учди. Балки уйқуларда, ҳулё (хаёл) ларда ул зоти сотуда сифатнинг руҳи ила суҳбат этармиз”<sup>1</sup>.

Бу, XX асрнинг биринчи чорагида яшаб, туркий халқлар оламини мунаввар этган икки улуғ маърифатпарварнинг энг сўнгги учрашуви эди.

### Биринчи ўзбек драмасининг яратилиши

XX аср бошларида жадидчилик ҳаракати ва адабиётини бошлаб берган кишининг театр билан шуғулланмаслиги, санъатнинг халқ оммасига энг самарали таъсир кўрсатиши мумкин бўлган бу турига катта эътибор бермаслиги маҳол эди. Ўзининш тарих олдидаги миссиясини чуқур ҳис қилган адаб 1911

<sup>1</sup> Беҳбудий М. Танланган асарлар. – Б. 83.

йилда биринчи ўзбек драмаси - "Падаркуш"ни ёзиб, Туркистонда янги санъат турига тамал тошини қўйди. Сир эмас, мамлакатимизда узоқ асрлар давомида халқ театри фаолият олиб борган ва томошибинларга маданий хизмат кўрсатиб, байрамлар ва тўй-ҳашамларнинг қувноқ ўтишига муносиб ҳисса қўшиб келган. Лекин Беҳбудий ва унинг жадид сафдошлари бошлаб берган театр профессионал театр санъатининг дастлабки босқичи бўлди.

Шу нарсани унутмаслик лозимки, 1911 йили, Беҳбудий асаридан бир оз аввал, қўқонлик муаллим Абдурауф Самадовнинг "Махрамлар" пьесаси рисола шаклида нашр этилган. Бу тарихий факт, айрим ижодкорлар назарида, Беҳбудийни ўзбек драматургиясиинг отаси, "Падаркуш"ни эса биринчи ўзбек драмаси дейишимизга монелик қиласи. Лекин "Махрамлар"нинг дастлаб "Ўликлар" номи билан татар тилида ёзилгани ва муаллифнинг ўзи ҳам татар миллатига мансуб бўлганини эътиборда тутсақ, Беҳбудийни ўзбек театр санъатига, хусусан, ўзбек драматургиясига пойdevor қўйган сиймо сифатида эътироф этишимиз ўринлидир. Қолаверса, А.Самадовнинг бу асари "Падаркуш"дан кейин сахна юзини қўрган ва унинг сахналаштирилиши Туркистоннинг ўша йиллардаги маданий ҳётида "Падаркуш"нинг намойишидек улкан тарихий воқеа бўлмаган.

Ҳали миллий адабиётда драматургия намуналари бўлмаган бир пайтда "Падаркуш"нинг яратилиши оддий ҳодиса эмас эди. Шунинг учун ҳам ўзбек театрининг рус миллатига мансуб тарихчилари бу асарни Фонвизин қаламига мансуб "Дундук" ("Недоросль") пьесаси таъсирида яратилган, деган фикрни олға суриб келдилар. Ҳолбуки, 1877 йилдан 1917 йилгача бўлган даврда Туркистонга гастролга келган рус театрлари ёки театр труппаларининг бирортаси Тошкент, Самарқанд ёки бошқа шаҳарларда "Дундук"ни намойиш этмаган. Беҳбудийнинг ҳам бу асар билан таниш бўлгани ҳақида бирорта маълумот йўқ. Аммо шу тарихий даврда татар ва озарбайжон театрлари Туркистонга

гастролга келиб, кўплаб миллий саҳна асарларини намойиш этганларки, ўзбек театр санъатининг вужудга келишида шу театрларнинг спектакллари муҳим роль ўйнаган. Беҳбудийда драматургия ва театр санъатига қизиқишининг пайдо бўлиши ҳам шу театрларнинг Туркистон саҳналарида намойиш этилган спектакллари туфайли, десак хато бўлмайди.

Шу нарса эътиборга сазоворки, агар А.Самадовнинг “Махрамлар” пьесаси яқин ўтмишдаги иллатлардан бири - баччабозликка қарши ёзилган бўлса, Беҳбудий ўз асарида маърифатсизликнинг миллат ва миллатнинг ҳар бир аъзоси ҳаётига кўрсатажак фожиали зарарини тасвирлаб берган. Асарнинг “Падаркуш ёхуд Ўқимаган боланинг ҳоли” деб номланиши ҳам тасодифий эмас. “Падаркуш” муносабати билан ёзилган мақолаларнинг бирида асарнинг ҳаётда рўй берган реал ҳодиса таъсирида ёзилгани айтилади. Бу фикрнинг ҳақиқатга қанчалик мос ёки қанчалик зид эканидан қатъий назар, XX аср бошларида ўз фарзанди тарбиясига эътибор бермаган оталар ҳам, ёшлик йиллари такасалтанг, ишёқмас, майшатпаст бойвуччалар даврасида ўтган болалар ҳам оз бўлмаган. Беҳбудий “Падаркуш”да нафақат шундай оталар, балки шундай фарзандларининг ҳаёти ҳам фожиа билан тугаши мумкинлигини кўрсатиб, уларнинг ҳар иккаласини ва, умуман, XX аср бошларидағи ўзбек жамиятини огоҳлантиришга интилган. Шу огоҳлантирувчи пафос, жадидчиликнинг туб моҳиятини очувчи маърифатпарварлик ғояси асарнинг катта ижтимоий ва маърифий аҳамиятини белгилаб беради ҳамда унинг ўша даврнинг энг муҳим ва долзарб мавзусига бағишиланганини кўрсатади.

Муаллиф асар сарлавҳасидан кейин қавс ичидаганинг жанри ва мавзусини “Туркистон майшатидан олинган ибратнома” деб белгилаган. Шунингдек, асарни китобхонга “3 парда 4 манзарали миллий биринчи фожиа” сифатида тақдим этган. Асарда Бой (50 яшар) ва унинг ўғли Тошмурод (15-17 яшар) дан ташқари, Домулла (янги фикрлик бир мулла, 30-40 яшар), Зиёли (Оврупо

либосида, ўрусча ўқифон, миллатчи мусулмон) ва бошқа персонажлар ҳаракат этадилар.

Асар Домулланинг Бой меҳмонхонасига кириб келиши билан бошланади. Шу пайт Тошмурод меҳмонхонага кириб, ким биландир томоша кўргани кетаётганини айтади ва отасидан пул сўрайди. Тошпўлат муддаосига эришиб чиқиб кетгач, Бой билан Домулла ўртасида қуйидаги суҳбат бўлиб ўтади:

“Б о й. Сўзлашиб ўлтуринг, тақсир.

Д о м у л л а. Хўб, хўб, бойвачча катта бўлубдур. Худо умр берсин, усули жадид мактабигами ўқийдур ёинки эски мактабга?

Б о й. Иккисига ҳам бормайдур.

Д о м у л л а. Ўз ҳовлингизда ўқитатурғонсиз?

Б о й. Йўқ, йўқ. Мен ўғлумни ўқутмоқға ўйлаганим йўқ.

Д о м у л л а. Ажойиб, сабаб недурки, ўқутмайсиз? Ваҳолонки, ўқумоқ қарз ва илм сабаби иззати дуне ва шарофати охиратдур.

Б о й. Манинг хаёлимға дунёнинг сабаби, иззати – бойлик. Охиратға бўлса, худонинг қилган тақдирни бўлур. Чунончи, биз кўрамизки, одамлар бойни муллодан зиёда иззат қиласурлар. Хусусан, мана банклар қўпайди. Катта бойлар чилен бўлуб, ҳар ким чиленларни иззат қилур, ҳатто иши тушатурғонлар чилен молини қиммат олур, азбаски, чилен илтифотига олмаган одамларга банклар пул бермайдурки, сўнгра муомиладорлар синиб, майда-майда бўлур, билдингизми?

Д о м у л л а. Бу сўзларингиз ҳозирги замонага маъқул, лекин чилен ва бойларни иззатлари вақтинча ва халқни кўзи очилгунчадир. Ҳолбуки, аларни иши тушганлар иззат қилур, муллони бўлса, барча халқ иззат қилур, яъни муллони илми иззат қилинадур.

Б о й. Бизни ҳам бойлигимиз иззат қилинадур, ҳатто мусулмонлар нари турсун, ўрус ва арманлар-да иззат қилур.

Д о м у л л а. Иззатни нари қўйдук, агарда ўғлингизни ўқутсангиз, дафтaringизни ёзар, намозингизни ва мусулмончилигини яхши билур ва ҳам сизға савоб бўлур.

Б о й. Мирзалик осон, мана, Хайруллога ойинда етти сўм

бераман, кундузлари миrzалик ва оқшомлари меҳмонхона ишини қилар ва ҳатто, уйқум келгунча ходими қилар, китоб ҳам ўқуб берар...

...Д о м у л л а . Сиз илгари замонда бир нави ила бой бўлубсиз, аммо энди бой бўлмоқ нари турсун, фақат рўзғор ўтказмоқ учун (ҳам) керак, Кўрамизки, йигирма-ўттиз йилдан бери барча савдо ишлари армани, яҳудий ва бошқа ажнабийлар қўлига ўтди, муни сабаби бизларнинг ўқимағонимиздур. Ўқимағон бойваччаларни кўрамизки, ота молини барбод этар ва охири хор ва зор бўлур, бинобарин, ўғлингизни ўқутмоқни сизга таклиф қиласман.

Б о й. Ай, домулло! Сиз манга таҳқиқчими? Ўғул маники, давлат маники, сизга нима? Ўқуганни бири сиз: емоқға нонингиз йўқ, бу ҳолингиз билан манга насиҳат қилурсиз. Хайрулло! Меҳмонхонани қулфла, уйқум келди. (*Х а й р у л л а лаъли ва асблобларни жамлаб мунтазин турар.*)<sup>1</sup>.

Драма экспозициясида бўлиб ўтган Бой билан Домулланинг бу суҳбати ҳар иккала персонаж моҳиятини очибгина, уларнинг ўтган аср бошларидаги ҳалқ оммасининг қайси қатламига мансублигини кўрсатибгина қолмай, воқеаларнинг кейинги ривожи ва ҳатто хотимасини ҳам, пружина сингари, ўзида сиқибушлаб туради. Бу саҳнадаги Домулла образидв Беҳбудий ўзининг ижтимоий, иқтисодий ва маърифий қарашларини ифодалашга уринади. У ўзининг жадидчилик-маърифатпарварлик ғояларини шу образ орқали томошабининг етказмоқчи бўлади. Шубҳасиз, томошабинларнинг Бойга руҳан яқин қисмига Домулла-Беҳбудийнинг бундай насиҳатлари кор қилмаслиги мумкин. Шунинг учун Бой меҳмонхонасидан ҳайдалаётган Домулла энди залга қараб, дейди:

“Д о м у л л а (одамларга қараб). Ўқумоқ ва мулла бўлмоқ учун пул керак, бадавлатларимизни ҳоли бул, бас, бу кетиш ила, наузамбиллоҳ дунё ва охиратға расво бўлурмиз, ўқумоқ барча мусулмонга, эркак ё хотун бўлсун, фарз эди. У қайда қолди? Оҳ,

<sup>1</sup> Беҳбудий М. Танланган асарлар. – Б. 40-42.

вой бизни ҳолимиизға!..”<sup>2</sup>

Бундан қарийб 100 йил аввал ёзилган бу асардаги Домулланинг халқни маърифатга даъват этиши, унинг тақдиридан қайғириши билан боғлиқ мотив ҳали ҳам ўз қимматини йўқотмаган. Негаки, шиддат билан ривожланиб бораётган жамиятда яшаб, йилдан-йилга ривожланиб ва тармоқланиб бораётган билимларни мукаммал эгалламасдан туриб, буюк келажакни барпо этиш мумкин эмас. Шу маънода жадидларнинг, жумладан, Беҳбудийнинг маърифатпарварлик ғоялари бугун мамлакатимизда олиб борилаётган маърифий ва маданий жараён билан уйғун бўлиб қолмоқда.

“Падаркуш” драмасининг асосий қаҳрамонларидан бири Тошмурод охир-оқибат майшатпаст шериклари билан келиб, отаси яширган пулни ўғирламоқчи бўлади. Шу пайт унинг шериклари қўлга тушмаслик учун воқеадан огоҳ бўлиб қолган отасига дафъатан пичноқ санчадилар. Ҳам отасидан, ҳам отасининг давлатидан айрилган Тошмурод қамоқقا олинади. Беҳбудийнинг фикрига кўра, ўқимаган болани ўтган аср бошларида тахминан шундай баҳтсиз келажак кутарди.

“Падаркуш”нинг матбуот ва саҳна юзини кўриши оғир кечди. Ўша йилларда ташкил этилган ҳар бир газета чор хукуматининг маҳсус рухсати берилгандан кейингина дунё юзини кўрганидек, бу асарнинг ҳам рисола шаклида чоп этилиши ва саҳналаштирилиши учун чор маъмурларидан рухсатнома олиш зарур эди. Ўзбек театри тарихига оид манбаларда айтилишича, драма гарчанд 1911 йилда ёзилган бўлса-да, драматург асар устида кимларнингдир фикр-мулоҳазалари асосида ишлаб, уни 1912 йилнинг август ойида нашрга тайёрлаган. Асарнинг нашр этилиши осон кўчсин учун уни “Бородино жанги ва Русиянинг француزلар босқинидан халос бўлишининг юбилейи”га бағишилаган.

Адабиётшунос Бойбўта Дўстқораев топган маълумотга қараганда, 1912 йил 26 август куни Самарқанддаги Тиллакори

<sup>2</sup> Ўша асар. – Б.42.

мадрасасида бўлиб ўтган “Ватан муҳорабаси байрами”да Беҳбудий “Падаркуш ёхуд Ўқимаган боланинг ҳоли” номли “З пардалик Туркистоннинг ҳозирги майшатидан олинмиш фожеа театру рисоласи”ни “Самарқанд волийси жаноблари”га топшириб, “ватан музafferияти ёдгори учун онинг нашрига рухсат берилмак”ни илтимос қилган. “Волий жаноблари, - деб ёзилган у топган маълумотда, - кўб хурсандлик илан олуб, нашрга рухсат бермакни ваъда қилибдурлар”<sup>1</sup>.

“Падаркуш” шундай саъй-ҳаракатлар натижасида бўлса керак, Бухорода чиқа бошлаган “Турон” газетасининг 1913 йил 1 ва 3 январь сонларида босила бошлиайди. Аммо газетаинг ёпилиши муносабати билан асарнинг сўнгги қисмлари босилмай қолади. Ниҳоят, “Падаркуш” “Самарқанд волийси” – ҳарбий губернатор генерал-майор Илья Олешилидзенинг ёрдами ва “матбуот ишлари Тифлис қўмитаси”нинг 1913 йил 23 июль санали рухсати билан Самарқанддаги Газаров ва Сиянов матбаасида босилиб чиқади. Аммо ҳали на Тошкентда, на Самарқандда миллий театр труппасининг шаклланмаганлиги туфайли асарни саҳналаштириш ишлари ҳийла чўзилади. Ниҳоят, 1914 йил 15 январь куни Самарқандда, ўша йилнинг 16 февраль куни эса Тошкент (Колизей театри) да биринчи ўзбек драмасининг саҳна юзини қўриши халқ ва мамлакат ҳаётида унтилмас воқеа бўлди. “Ойна” журналининг 1914 йил 14-25 январь сонида асарнинг Самарқандда қўйилиши ҳақида бундай сўзлар ёзилди: “Падаркуш” фожиаси или “Алдадик ва алдандик” воқеаси саҳнага қўйилди. “Падаркуш”(нинг) ниҳоятда яхши амалга қўйилғони ҳозир бўлғон ҳар кишининг розилигидан маълум эди. Халқ ниҳоятда кўп келиб, билет етишмагани ва жой йўқлиги учун уч-тўрт юз киши қайтиб кетди. Ибратхонанинг борлиқ ўрни 320 нафарга кифоя қиласар эди. Яна эллик нафар ўрин ҳозирланган бўлса ҳам кифоя этмади”<sup>2</sup>.

<sup>1</sup> Дўстқораев Б. “Падаркуш”нинг ғаройиб саргузаштлари, - Ўзбекистон адабиёти ва санъати, 2002 йил 11 январь.

<sup>2</sup> Кўчирма адабиётшунос Шерали Турдиевнинг “Махмудхўжа [www.ziyouz.com](http://www.ziyouz.com)” kutubxonasi

Бу сўзларга изоҳ тарзида айтиш жоизки, Беҳбудий томошибинларнинг миллий спектаклга бўлган фавқулодда катта қизиқишидан маърифий ишларни ривожлантириш мақсадида фойдаланмоқчи бўлди. Асарнинг 7 май куни бўлиб ўтган иккинчи намойишида, “Ойна” журналиниң хабар беришича, билетлар сотилишидан 384 сўм 50 тийин йиғилиб, шундан 184 сўм 50 тийин спектаклга сарфланган харажатга кетган. Қолган 200 сўмдан 110 сўми мактаб ислоҳига, 35 сўми Жамбойдаги Бозорамин Ҳодижўжа таъсис этган ва муаллим мулла Комил идорасидаги мактабга, 15 сўми Бухорий қишлоғидаги мулла Жўрабой мактабига, 15 сўми “городской училищче”да таҳсил олаётган мусулмон болаларга, колган 35 сўми эса мулла Абдуқодир Шакурий мактабига ажратилган. “Кўринадики, - деб ёзади адабиётшунос Шуҳрат Ризаев, - даромаднинг сўнгги тийинигача, ҳатто ошиғи билан фақат ва фақат маърифий ишларга сарф бўлган. Демак, Туркистондаги илк театр труппаларини, шу жумладан, Самарқанд труппасини ҳам ҳозирги давлат таъминотидаги труппалар каби тасаввур этмаслик керак. Бу кўнгилли ёшларнинг ишонч-ақидалари юзасидан ўз ҳаловатларидан кечиб амалга оширган саъй-ҳаракатлари, оврупоча театр санъатини тарғиб этиш йўлидаги интилишлари бирлаштирган ижодий-маърифий жамоалар эди»<sup>1</sup>.

Самарқандда ҳам, Тошкентда ҳам асардаги барча роллар маҳаллий маърифатпарвар кишилар томонидан ижро этилди. Бу, ўзбек жадидларининг ва, умуман, ўзбек жадидчилик ҳаракатининг тантанавор кунлари эди. Кўп ўтмай, “Падаркуш” турли театр труппалари ижросида бутун республикани айланиб чиқди.

Бугунги томошибин ва китобхон учун биринчи ўзбек драмаси ибтидоий асар бўлиб туюлиши мумкин. Лекин ҳали

---

Беҳбудий” мақоласидан олинди. – Қаранг: Фидойилар. Тошкент: Фан, 1990. – Б.7.

<sup>1</sup> Шуҳрат Ризо. “Падаркуш” ёхуд Самарқанд тарихидан лавҳалар, - “Ватан” газетаси, 1994. 39-сон.

замонавий театр санъатидан яхши хабардор бўлмаган томошибинлар учун “Падарқуш”нинг 1914 йилдаги намойишлари афсонавор воқеа эди. Ўзбек маданияти тарихида янги санъат – театр санъати туғилган эди. Беҳбудий ва унинг сафдошлари матбуот орқали бу янги санъатни кенг тарғиб қилишга киришдилар. Беҳбудий театрга бағишлиланган қатор мақолалар ёзиб, бу санъатнинг аҳамиятини бундай тушунтириди:

“Теётр нимадур? Жанобига теётр ибратнамодур, теётр ваъзхонадур, теётр таъзир адабидир. Теётр ойинадурки, умумий ҳолларни анда мужассам ва намоён суратда кўзликлар кўруб, кар-кулоқсизлар эшитиб асарланур. Хулоса: теётр ваъз ва танбиҳ этувчи ҳамда заарарлик одат, урф ва таомилни, қабиҳ ва заарини аён кўрсатгувчидур. Ҳеч кимни риоя қилмасдан тўғри сўйлагувчи ва очиқ ҳақиқатни билдиргувчидир”<sup>2</sup>.

Бу таъриф Беҳбудийнинг театр санъатига қандай катта умид ва юксак тасаввур билан муносабатда бўлганидан, бу санъат ёрдамида ҳалқ ва жамият ҳаётидаги иллатларни супуриб ташлаб, улар ҳаётини янгилаш ва яхшилаш мумкинлигига ишонганидан ва, эҳтимол, яна янги саҳна асарларини ёзмоқчи бўлганидан дарак беради. Аммо тақдир Беҳбудийга бу қутлуғ ниятларнинг амалга ошишида фаол иштирок этиш имконини бермади. Лекин “Падарқуш” таъсирида ўтган асрнинг 10-йилларида ўнлаб саҳна асарлари майдонга келди, драматурглар сафи Насрулла Қудратилла, Абдулла Қодирий, Абдулла Бадрий, Ҳожи Муин, Абдулла Авлонийлар ҳисобига кенгайди. Ва кўп ўтмай, улар сафига Ҳамза, Фитрат ва Чўлпон сингари забардаст драматурглар келиб қўшилдилар.

### Жадид адабиётининг муҳим соҳаси

Шу нарса ғаройибки, шоҳнинг душмани шоҳ, гадонинг душмани гадо, деганлариdek, “Падарқуш” мпектаклини Самарқанднинг ўша йиллардаги барча зиёлилари ҳам катта

<sup>2</sup> Беҳбудий М. Танланган асарлар. – Б. 174.

мамнуният билан қабул қилдилар, деб бўлмайди. Аслида, мусулмон миллатига мансуб халқларни эллик йил давомида маърифатдан четда ушлаб турган чор ҳукумати Туркистонда театр санъатининг туғилишига, бинобарин, “Падаркуш”нинг саҳна юзини кўришига қаршилик кўрсатиши мумкин эди. Аммо чор охранкаси бу маданий воқеада Россиянинг давлат манфаатларига зид бирор нарсани кўрмади.

1917 йил 7 февраль куни “Шахрисябзский” лақабли хуфялардан бири чор охранкасига бундай маҳфий маълумотни берган:

“Бундан уч-тўрт йил илгари Самарқандда сарт лаҳжасида нашр этилаётган “Ойна” журналининг муҳаррир-ношири Беҳбудий “Отасининг қотили” маъносини англатувчи “Падаркуш” деган пьесани сарт лаҳжасида ёзган эди.

Беҳбудий, йўналишига кўра, тараққийпарвар-миллатчи бўлиб, Туркияда таълим олган кўринади.

“Падаркуш” пьесасида эски усуладаги тип (консерватор) саҳнага олиб чиқилган, у болалари русланиш, кофир бўлиб кетмасликлари учун уларнинг маълумотли бўлишларини истамайди ва уларнинг кофир бўлиб кетишидан қўрқади. Сарт айтадики, мен бутун умр бўйи яхши яшаб, бойлик ортиридим ва шу бойлик болаларимнинг эмин-эркин яшашлари учун bemalol етади.

Зикр этилган сартнинг болалари савдо ишлари юзасидан руслар билан доимий муомалада бўлганликлари учун ҳар қалай русча сўйлашишни ўрганиб олишган, шу билан бирга улар руслардан, худди ёввойи ва қип-қизил саводсиз кишилардек, ичкилик ичишни ҳамда рус аёллари билан ишрат қилишни ҳам ўзлаштириб олишган. Охир-оқибат бир куни майшат учун ёш сартларнинг пуллари етмай қолиб, оталарининг пулларини ўғирлаш учун янги танишларидан бири билан боришган. Ота сандиқнинг очилган овозидан уйғониб кетгач, ўлдирилган, айборлар эса қамоқقا олинган.

Хотимада сартларнинг ўсиб бораётган авлоди таълим олмай

қолишининг салбий томонлари тўғрисида монолог берилган...

...Пъеса мазмуни кекса сартларга ниҳоятда ёқмаган ва улар спектаклни қўювчиларни “падаркушлар” деб аташган...”<sup>1</sup>.

“Шахрисябский”нинг бу хуфяномаси сўнгги йилларда илмий-оммабоп адабиётда учраётган “падаркушлар”нинг кимлар эканлиги масаласига аниқлик киритади. Айрим тергов материалларидан илмий-оммабоп китобларга қўчиб ўта бошлаган “падаркушлар” 1917 йил арафасида пайдо бўлган сиёсий партия аъзолари эмас, балки, “Шахрисябский” талқин этганидек, “Падаркуш” спектаклида артист ёки ташкилотчи сифатида иштирок этган кишилардир.

Самарқандда Беҳбудий асарини найза билан қарши олган ва спектаклда иштирок этганларни “падаркушлар” деб ҳисоблаган кишилардан бири... таниқли шоир ва мударрис Саидаҳмад Васлий эди. У “Садои Фарғона” газетасининг 1914 йил 83-сонида чоп этилган “Шариати исломия” сарлавҳали мақоласида театрни ҳаром деб эълон қиласиди. “Ойна” журнали эндиғина туғила бошлаган театр санъатига нисбатан бундай хато ва зарарли муносабатни мутаассиблик намунаси сифатида баҳолаб, унга кескин зарба беради.

“Падаркуш”нинг турли шаҳарлардаги “премъера”ларидан сўнг кўп ўтмай, Биринчи жаҳон уруши ўт олди. Янги тарихий давр Беҳбудий олдига янги вазифаларни қўйди. Адид назарида, у энди бутун кучини матбуотга бағишлиши, матбуот орқали ватандошларининг онги ва дунёқарашига таъсир кўрсатиши, тўғрироғи, улар онги ва дунёқарашининг шаклланишига ёрдам бериши лозим эди. Шунинг учун ҳам Беҳбудий 1913-1914 йиллардан бошлаб асосий эътиборини матбуот масалаларига қаратди.

Шубҳасиз, Беҳбудий шу йиллардан аввал ҳам Туркистон, Кавказ, Крим ва Татаристонда нашр этилган газеталарда публицистик мақолалари билан иштирок этган. Ҳожи Муиннинг

---

<sup>1</sup> Тарихнинг номаълум саҳифалари. Ҳужжат ва материаллар. Биринчи китоб. – Тошкент, 2009. – Б.27.

хабар беришича, у муаллиф сифатида қатнашган газета ва мажмуалар сони 18 та бўлган. Ҳожи Муин мазкур 18 та нашрни санар экан, улар орасида “Туркистон вилоятининг газети”, “Тараққий”, “Тужжор”, “Хуршид”, “Шуҳрат”, “Осиё”, “Турон”, “Хуррият”, “Нажот”, “Меҳнаткашлар товуши”, “Улуғ Туркистон” сингари маълум ва машҳур газеталардан ташқари, “Таржимон”, “Вақт”, “Шўро”, “Улфат”, “Иршод”, “Тоза ҳаёт” сингари нашрлар ҳам бўлганини айтган. Афсуски, беҳбудийшунослар адибнинг шу рўйхатдаги аксар газеталарда эълон қилинган мақолаларини ҳали тўплаб, нашр этиб ва ўрганиб улгурмаганлар.

“Бу 18 газета ва мажмуаларда, - деб ёзади Ҳожи Муин, - Беҳбудийнинг икки юзга яқин мақоласи босилгандурким, улар бир ерга тўпланғонда 5-6 юз бетлик бир китоб бўлур. Беҳбудийнинг мазкур газета ва мажмуаларда босилғон мақолаларининг кўбиси муҳим мавзуларда ёзилғон бўлуб, ҳануз эскирган эмас ва бу кунларда ҳам биз учун дастур ул-амал бўла турғон фойдалик сўзлардур”<sup>1</sup>.

Агар Беҳбудий XX аср бошларида, аниқроғи, 1905 йил воқеаларидан кейин даврнинг долзарб ва муҳим мавзуларида мақолалар ёза бошлаган бўлса, 1913 йилга келиб, ўзи “Самарқанд” деган газетани чиқаришга аҳд қиласи Бу газета, Ҳожи Муиннинг гувоҳлик беришича, Самарқанд маърифатпарварларининг моддий ёрдами билан 1913 йил апрелида Беҳбудий муҳаррирлигида чоп этила бошлади. Ҳафтада икки марта чиққан мазкур газета дастлаб икки бетли, 3-8-сонидан бошлаб эса тўрт бетли бўлиб, 400-600 нусхада тарқалган. Чор хукуматининг таъқиб ва тазиёқи ҳамда моддий жиҳатдан қийналганлиги сабабли 44-сонидан кейин тўхташга мажбур бўлган.

Халқ ўртасида янги фикрлар тарқата бошлаган газетанинг ёпилиши ёшларга қаттиқ таъсир қилди. Улар таҳририятга хатлар ёзив, газетани чиқаришда давом этишни илтимос қилдилар. Қўқонлик ёшлардан Акобир Шоҳмансур ўғли билан Мирзоҳид

---

<sup>1</sup> Ҳожи Муин. Танланган асарлар. – Б. 27.

Оқилий газета нашрининг давом этиши учун 500 сўм ҳажмида иона юборишлири ва 200 нусхага обуна бўлишларини маълум қилдилар. Улар илтимосига биноан Беҳбудий газетанинг 45-сонини бир бетли қилиб чиқарди. Қолган озгина сармоя билан 1914 йил августида “Ойна” ҳафталик журналини нашр этишга киришди. 20 ой фаолият кўрсатган ва шу давр мобайнида 68 сони чиққан “Ойна” Туркистондан ташқари, Татаристон, Кавказ, Афғонистон, Эрон, Туркия ва Мисрга қадар тарқалиб, ўзбек матбуоти тарихида чуқур из қолдирди. Беҳбудий ва бошқа жадидларнинг “Ойна” саҳифаларида эълон қилинган, шеър, хабар ва мақолалари Туркистон халқларининг миллий уйғонишида муҳим роль ўйнади.

“Ойна” журналининг 1914-1915 йил сонларини вараклаган киши Беҳбудийнинг рангба-ранг мавзуларда қалам тебратганини кўради. Аввало шуни айтиш жоизки, “Беҳбудия” кутубхонаси, “Самарқанд” газетаси ва “Ойна” журналини ташкил этиш жараёнида Беҳбудий чарчаб, сиҳат-саломатлиги бир оз заифлашган эди. Шунинг учун у 1914 йилнинг 29 майида иккинчи маротаба саёҳатга чиқиб, араб мамлакатларини айланиб келади. Адибнинг шу сафардан олган таассуротлари “Ойна” журналининг бир неча сонларида босилади. Биз бу “Сафар хотиралари” билан танишар эканмиз, Беҳбудийнинг турли-туман кишилар билан бўлган учрашувлари, Туркия ва Арабистон мамлакатларидағи у бўлган маърифат масканлари, меъморий обидалар кўз олдимиздан кино тасасидек ўтгандек бўлади. Мана, у пароходда яхудий ва рус миллатига мансуб кишилар билан кетар экан, яхудий ҳамроҳлардан бири бундай дейди:

- Туркистон – эски дунёнинг Америкаси. Пахта, маъдан, ғалла, хуллас, ҳар нарса бор. Туркистон олтиндир. Агарда Русия ҳукумати монелик қилмаса, барча мулкимни сотиб, пулига Туркистондан ер олиб, дехқончилик қиласадим. Олтин бериб, ер олиб, сўнгра олмос кўтарар эдим. Аммо на чора, Русия қонунлари биз, яхудийларнинг бу орзуларимизнинг рўёбга чиқишига имкон бермайди.

Беҳбудий унинг сўзларини тинглаб, ўзича: “Рус ҳукуматига раҳматким, бунга имкон бермайди. Акс ҳолда биз, ўзбеклар, ватансиз қолиб, дарбадар бўлиб кетармидик”, дейди.

“Сафар хотиралари”даги шу лавҳанинг ҳайратланарли томони шундаки, Туркистоннинг жаннатмонанд ватан эканини билган яҳудий агар шу ердан кичик бир ерни сотиб олса, миллионер бўлиб кетишини яхши билган. Туркистондан ер сотиб олиб, шу ерда яшаб, “ердан олмос кўтариш”ни орзу қилган. Аммо Беҳбудий маҳаллий халқнинг, мазкур яҳудийдан фарқли ўлароқ, “эски дунёнинг Америкаси”да яшаб туриб, унинг бойликларидан, моддий имкониятларидан фойдалана олиш имкониятига эга эмаслигидан, бунга ҳукуқи ҳам, билими ҳам йўқлигидан ўпкаланади.

Беҳбудий нафақат маърифатпарвар педагог ва адаб, балки журналист сифатида ҳам Туркистон аҳлининг басират қўзларини очишга интилди, ўзининг ва бошқа халқларнинг тарихини билмай, XX аср учун, айниқса, зарур бўлган иқтисодий ва ҳукуқий билимларни, илғор халқларнинг тилларни эгалламай туриб фаровон яшаши, эрк ва ҳурриятга эришиши мумкин эмаслигини тушунтироқчи бўлди. Агар унинг шу йилларда ёзган мақолаларига чуқур назар ташласак, ана шу фикр-фоя бу мақолалар оша “қизил ип” бўлиб ўтиб турганини кўрамиз.

Беҳбудийнинг “Танланган асарлар”ида эълон қилинган “Туркистон”, “Шердор мадрасаси”, “Туркистон тарихи керак”, “Эҳтиёжи миллат”, “Бизни ҳоллар ва ишлар», “Жаҳолат дардларидан”, “Бизни кемирувчи иллатлар”, “Икки эмас, тўрт тил лозим”, “Ёшларга мурожаат”, “Муҳтарам ёшларга мурожаат” сингари мақолаларнинг сарлавҳасиёқ уларда нима ҳақида баҳс юритилганидан дарак беради.

Беҳбудий яшаган йилларда ё рус-тузем мактабларида таълим олганлари, ёки руслар билан савдо иштирок этганлари, ёхуд бошқа бирор баҳонаи сабаб билан рус тилини билган ёшлар пайдо бўла бошлаган эди. Беҳбудий умид қўзларини ана шу ёшларга ва уларнинг бошқа тенгдошларига

қаратиб, бундай ёзади:

“Мұхтарам биродарлар! Барчамизга офтоб каби равшан ва аёндирики, макотиб (мактаб) - тараққийнинг бошланғичи, маданият ва саодатнинг дарвозасидур. Ҳар миллат энг аввал макотиби ибтидойисини замонча ислоҳ этиб кўпайтурмағунча тараққий йўлига кируб маданиятдан фойдаланмас... “Муборизи ҳаёт” (ҳаёт учун кураш) майдонида мутлақо мағлуб бўлур, оёқлар остида эзилур, диний, иқтисодий ишларда ўзгаларниг асири бўлуб, бора-бора миллият ва диёнатини ҳам қўлдан берур. Ана ушбу йўллар ила оҳири маҳв ва нобуд бўлуб кетар.

...ер юзидағи барча миллатлар ўз болаларини ибтидоий тарбиясига ва мактабларнинг ҳар жиҳатдан интизом ва акмолиға (етук бўлишига) аҳамият беруб, болаларини миллий ва диний рухда муқаммал суратда етишдурурлар. Анинг учундирики, ўзга миллатлар диний ва миллий ҳиссиётға молик бўлуб, ҳар ишда диёнат ва миллиятни муаддал (тeng) тутарлар”<sup>1</sup>.

Беҳбудий янги авлод янги тарихий давр талабларига жавоб берса оладиган авлод бўлиб шаклланиши, ота-боболари бой берган эрк ва хурриятни, Ватанни қайтариб олишлари учун улар тарбиясига катта эътибор беришни зарур, деб ҳисоблаган. У шу мақсадда ёш авлоднинг нафақат ҳар томонлама билимли, маданиятли, балки диний қадриятларга содик авлод бўлишини ҳам истайди. Зоро, дин, ислом динига эътиқод ўшларнинг ўша йилларда ўз миллий хусусиятларини, ўзлигини сақлаб қолишларида қалқон вазифасини ўташи лозим эди.

Беҳбудий ўшларнинг “ибтидоий тарбия”сига эътибор беригина қолмади. Пиравард мақсади маърифат орқали мустақилликка эришиш бўлган адаб Давлат Думасига аъзо, суд идораларида адвокат бўлиб, ўз халқининг миллий манфаатларини ҳимоя қила биладиган кишиларни, фан ва маданият, халқ хўжалигининг барча соҳалари бўйича малакали мутахассисларни тайёрлаш масаласини ҳам кун тартибига қўйди. У “Эҳтиёжи миллат” деб номланган мақоласини бундай сўзлар

---

<sup>1</sup> Беҳбудий М. Танланган асарлар. – Б. 176-177.

билин тугатган эди:

“Бутун Туркистондан ўн бой йилинда минг сўмдан берса, 25 бола учун Тошканда диний ва замонавий бир “пансиун” лайли (кечки) ва баҳори (кундузги) 5 мукаммал мактаб бино бўлуб, ҳар йил хукумат мактабинда 50 бола тарбиялайдур.

Ўн йилда булардин... 200 муҳандис, дўқтур, ҳукуқшунос, муаллим, техниқ, замона тожири (савдогар), валлоҳ (Худо хоҳласа)... чиқар ва бизни замон одамлари қаторида қўярлар ва давлат ишига кираплар. Руслар ила бизни ҳасан (яхши) имтизожларимизға (бирикишимизга) хизмат қиласурлар.

Ал-он миллатимиз бойлардан шуни кўз тутар, халойиқни барбод эта турғон тўйларни эмас. Ох, бу сўзларни тушуна турғон бойлар бизда етушганми?”<sup>1</sup>.

Барча жадидларни ўйлантирган ҳалқ ва мамлакат тақдири билан боғлиқ бу масала Беҳбудий ижтимоий-сиёсий қарашлари марказида туради. У шу масалани ҳал этмасдан туриб, Туркистон ҳалқининг ўз тақдирини ўзи белгилаши мумкин эмаслигига амин бўлган. Шунинг учун ҳам у “миллат” ва “диёнат” сўзларини худди эгизак сўзлардек бирга ёзиб, бойларни инсофга, ҳалқ ва мамлакат тақдири йўлида азият чакишга даъват этган.

Хуллас, юрт қайғуси, миллатнинг бугунги ва эртанги тақдири ҳақидаги фикрлар Беҳбудий ижтимоий-сиёсий мақолаларининг қаймоғи – квантэссенциясини ташкил этади.

### Ижтимоий силсилалар гирдобида

Россияда 1917 йил Февраль инқилобининг рўй бериши Туркистондаги ижтимоий-сиёсий жараённи тезлаштириб юборди.

“Инқилоб даврида муфти Маҳмудхўжа, - деб ёзган эди Ҳожи Муин, - Жаҳон муҳорабасининг сўнгти йилларинда асабий хасталиги шиддатланиб, ишлай олмайдиган бир ҳолға келиб эди.

---

<sup>1</sup> Ўша асар. – Б.201.

Февраль инқилоби билан яна янги рух, янги қувват олиб ишга киришди”<sup>1</sup>.

Февраль инқилобининг рус империясини ларзага келтириб, Россияда уч юз йил ҳукмронлик қилган Романовлар сулоласини тарих саҳнасидан қувиб чиқариши лоқайдлик ва умидсизлик ҳолатида яшаётган Беҳбудийни уйғотиб юборди. У яна Самарқанднинг ижтимоий ҳаётида фаол иштирок эта бошлади ва Самарқанд мусулмонлар ижроия қўмитасининг иккинчи раиси этиб тайинланди. У шу лавозим тақозоси билан ҳатто Бухорога бориб, тараққийпарвар кучларга муайян ҳуқуқлар берган амирни табриклаб келди. Лекин амирнинг бу манифести Бухоро жадидларини ҳам, афкор оммани, шу жумладан, Беҳбудийнинг ўзини ҳам алдашдан ўзга нарса эмас эди.

Аммо давр ўзгариб, ижтимоий ҳаёт саҳнасида янги-янги кучлар пайдо бўла бошлади. Шундай кучлардан бири Мухторият дастури лойиҳасини ишлаб чиқиб, уни 1917 йил августидаги “Кенгаш” газетасида эълон қилди. Бу лойиҳа Туркистондаги таниқли сиёсий арбоблар, ҳуқуқшунослар ва уламолар иштирокида тузилган бўлиб, улар орасида Беҳбудий ҳам бор эди.

Аммо Туркистон ўлкасини демократик янгилаш ғояси мутаассиб ва қолоқ фикрли кишиларнинг қаттиқ қаршилигига учради. Мусулмон жамияти мазкур кураш натижасида икки гурӯҳга ажралиб кетди. Бу, большевикларнинг яқинлашиб келаётган инқилоблари олдида фожиавий ҳолатни вужудга келтирди. Кўп ўтмай, большевиклар Тошкентда ҳокимиятни кўлга олишга муваффақ бўлдилар. Миллатнинг тараққийпарвар кучлари 1917 йилнинг 26 октябрида Қўқонда тўпланиб, Ўлка мусулмонларининг ЙУ фавқулодда қурултойини ўтказдилар. Бир неча кун давом этган қурултой Туркистон Мухторият ҳукуматининг тузилганини эълон қилди. Қурултойда ҳукумат аъзоларидан ташқари, Халқ мажлиси аъзолари ҳам сайланди. Мазкур аъзолар орасида Беҳбудий ҳам бор эди.

<sup>1</sup> Саидов Ҳ. Маърифат либосидаги озодлик, - Тошкент: Шарқ, 2000. – Б. 135..

Туркистон Мухторият ҳукуматининг ўрнатилиши Беҳбудийнинг кучига- куч, ғайратига-ғайрат қўшиб юборди. “27 ноябрда Хўқандда, - деб ёзди у “Туркистон мухторияти” сарлавҳали мақоласида, - Туркистон мухторияти умумий мусулмон съездига эълон қилинди. Муборак ва хабарли бўлсун! Камина ҳам мажлисда бўлиши учун ифтихор этаман. Яшасун Туркистон мухторияти!”

Чор мустамлакачиларининг ворислари бўлмиш большевиклар Туркистон Мухторият ҳукуматининг ўрнатилганидан мутлақо манфаатдор эмасдилар. Буни яхши билган Беҳбудий “Бизга ислоҳ керак”, “Ҳақ олинур, берилмас!”, “Қозоқ қардошларимга очиқ хат”, “Ёшларга мурожаат” сингари публицистик мақолалар ёзиб, тараққийпарвар миллий кучларни бирлашишга ва Туркистон Мухторият ҳукуматини ҳимоя қилишга даъват қилди. Лекин кучлар teng эмас эди. 1918 йилнинг 19 февраль куни Туркистон ўлка ҳарбий комиссари Е.Перфильев бошчилигидағи яхши қуролланган қўшин Қўқонни 12 замбаракдан ўққа тутиб, Мухториятни ҳам, Қўқони латифни ҳам қонга ботирди.

Бу, Беҳбудий орзу-умидларининг яна бир бор пайҳон этилиши эди.

1918 йилда Беҳбудий “Иттифоқ” жамиятининг саъи-ҳаракати билан мусулмон маориф шўъбасига мудир этиб тайинланади. Лекин маориф шўъбасига ўрнашиб олган европалик кимсалар мусулмон маорифи учун муҳим бўлган барча масалаларни Беҳбудийсиз ҳал қилишда давом этадилар. Беҳбудий истеъфога чиқишига мажбур бўлади.

Осипов қўзғолони воқеасидан сўнг Самарқандда талонторож бошланиб, ноҳақ қамоққа олишлар авж олди. “Катта тазминот (товон, йўқотиш) ларни ҳалқ тахаййул қила олмасдан, - деб ёзади Ҳожи Муин, - ер ва юртларини ташлаб қочдилар. Маориф иши ниҳоятда тазийиққа тушди. Ҳалқнинг ҳиссиёти динияси таҳқир қилинди. “Шу ишларга бирор чора тополурманми?” деб Маҳмудхўжа 1919 йил февраль ойинда

Тошкандға борди. Лекин бу сафариндан ҳеч бир натижа қўлға киргузолмади. Шундан сўнгра...”<sup>1</sup>

Шу ерда Ҳожи Муиннинг сўзларини бўлиб, Садриддин Айнийнинг Беҳбудий тўғрисидаги қўйидаги хотираси билан танишсак:

“1919 йил февраль ойинда Тошкентға бориб қайтди. Мактаб проғрамма ва Тошкентдаги илмий ҳоллар билан Самарқанд муаллимларини таништиromoқ учун муаллимлар мажлисини чақиришға буюрди. Лекин ўз ҳолатининг хилофинча ушбу мажлисга келмади. Шундан кейин кўчада кўришуб, мазкур мажлисға нима учун келмағанини, иккинчи мажлис учун қайси кун тайинланса, кела олишини сўрадим.

Ҳозир бир оз хастаман. Кайфим ва фурсатим бўлса, хабар берарман, деди. Мана бу охирги кўришимиз бўлди”<sup>1</sup>.

Беҳбудийнинг ўз одатига хилоф равишда муаллимлар билан учрашувга бормаслигининг сабаби Тошкент сафарининг бирор натижа билан тугамаганида эди. У Тошкентда ҳам, худди Самарқанддагидек, ҳамма нарсага ўзга юртлардан келган кимсаларнинг раҳбарлик қилиб, маҳаллий кадрларни сариқ чақага олмаётганини кўрди. Унинг қалбида Февраль инқилоби ва Туркистон мухторияти туфайли уйғонган умид ниҳоллари ҳали яшил барглар ёзиб улгурмасдан хазон бўлган эди. Бу ҳол айни пайтда унинг соғлиғига салбий таъсир кўрсатган эди.

Бу ўзига хос “лирик чекиниш”дан сўнг яна Ҳожи Муиннинг хотирасини ўқишида давом этсан: “Шундан сўнгра ҳеч бир кишиға онглатмасдан маслақдош ва фикрдошлари мулла Мардонқул Шоҳмуҳаммад ўғли, Муҳаммадқул Ўринбой ўғли билан 25 март ойинда 1919 йил асрорангиз бир суратда Самарқанддан ғойиб бўлди. Орадан бир ҳафта ўтгандан кейин буларнинг Қарши йўли билан сафарға чиққанлари, Қарши шаҳридан Бухоро ҳукумати тарафиндан ушланиб ҳибсга олинғонлари, ҳатто шаҳид

<sup>1</sup> Ҳожи Муин. Муфти Маҳмудхўжа ҳазратлари ким эди. – Китобда:  
Сайдов Ҳ. Маърифат либосидаги озодлик. – Б. 136.

<sup>1</sup> Ўзбекистон адабиёти ва санъати, 1988 йил 15 апрель.

бўлғонликлари шойиъ бўлди. Шундан сўнгра мухталиф (хилмалил) хабарлар кўп эшитилди. Лекин расмий суратда на ҳаётлари, на момотлари событ бўлмади. Шунинг ила баробар Самарқанд аҳолиси буларнинг шаҳид ўлғонликларини занни (тажмин) ила инониб маросими таъзия ва қадрдонишини ёд этмоқчи бўлди”<sup>1</sup>.

## Сирли ўлим

Ҳожи Муиннинг “Муфти Маҳмудхўжа ҳазратларининг қандай шаҳид бўлғонлиғи ва онинг томонидан ёзилған “васиятнома”нинг 1988 йил 16 сентябрда Шерали Турдиев, 1993 йилда эса Ж.Худойбердиев томонидан “Ўзбекистон адабиёти ва санъати” ҳафталиги ҳамда “Миллий уйғониш” (1993) тўпламида қайта эълон қилиниши билан яна Беҳбудий ўлимининг 1922 йилдаги “Инқилоб” журнали версияси адабий жамоатчилик ўртасида бирдан-бир ҳақиқат сифатида яшай бошлади. Бу версияга кўра, “Беҳбудий афанди ва йўлдошлари Шахрисабзда қўлға тушиб, тахминан икки ойдан сўнг Қарши шаҳрига юборилиб, онда (зинданда) бир неча кун ётқондан кейин шаҳид қилинғон”.

Ҳожи Муиннинг ёзишича, 1921 йилнинг март ойида “Бухоро тупроғи”дан келган Ҳожимурод Худойберди ўғли Беҳбудийнинг йўлдошлари Мардонқули Шоҳмуҳаммад ўғли ва Муҳаммадқул Ўринбой ўғли билан бирга Қарши шаҳрида Қаршибеги Тоғайбек томонидан шаҳид этилгани ҳақида маълумот олиб келган. Бу маълумотга кўра, Қарши беги Беҳбудий ва йўлдошлари қўлга тушганларидан сўнг уларни чақириб: “Сизлар нима учун қўлга тушдингиз?” деб сўраган. Беҳбудий Байтуллони зиёрат этиш мақсадида Самарқанддан чиққани, аммо йўлда амир маъмурлари томонидан “жадид, коғир ва тилчи (жосус)” сифатида қўлга олинганларини айтган. Орадан бир қанча вақт ўтгач, гўё амирдан қатл буйруғи келган ва Қаршибеги шу буйруқни бажарган.

<sup>2</sup> Қаранг: Сайдов Ҳалим. Маърифат либосидаги озодлик. – Б. 136-137.

Ҳожи Муиннинг ёзишича, Беҳбудийнинг фожиали ўлими тўғрисидаги мазқур хабар 1921 йилнинг март ойида келган. Аммо Фитрат, Чўлпон ва С.Айнийнинг Беҳбудий вафотига бағишланган шеърлари 1920 йилда ёзилган. С.Айний ҳатто бир шеърининг ёзилган санасини «1920, 1У», деб аниқ қайд этган. Демак, айтиш мумкинки, Беҳбудийнинг содик дўстлари ва издошлари устоз ҳалок этилганидан бир йил ўтгач, 1920 йилнинг апрель ойида хабар топганлар. Улар шу вақтнинг ўзиданоқ Беҳбудий ўлими сирларини билишни, унинг жасади қаерга дафн этилганини аниқлашни шогирдлик бурчи, деб билганлар. Фитратнинг ўз шеърини “Беҳбудийнинг сағанасини изладим” деб номлаши тасодифий эмас. Аммо бу шеърни ўқир эканмиз, шоирнинг устоз сағанасини топган-топмаганлиги тўғрисида аниқ фикрни учратмаймиз. Лекин шеърнинг қўйидаги сўнгги сатрлари бизни ўйлашга мажбур қиласди:

*...Бир дарак топмағоч, бирдан бир тикилди,  
Бор қучин тўплади,  
Золимнинг таҳтини титратган бир товуш  
Қичқирди:  
- Отамнинг қабрини қай ерга ёшурдинг?!  
Бот сўйла!..  
Кирли тож кўб қўрқди ботир товушдан,  
Сесканиб, титраб... ёшунди  
Бир жавоб бермасдан<sup>1</sup>.*

Бу сатрлардаги “золимнинг таҳти”, “кирли тож” сўзлари кимга қаратилган? “Бухоро инқилоби” ҳали содир этилмагани, Фрунзе бошчилигидаги қизил қўшиннинг Бухоро амирлигини тор-мор этиш режаси эса ҳали шаклланиб улгурмагани учун Фитрат бу сўзларни ёзганида, хоҳлаймизми ё йўқми, амир ва

<sup>1</sup> Фитрат Абдурауф. Танланган асарлар, 1-жилд. – Тошкент, 2000. – Б. 40.

амирликни назарда тутган бўлиб чиқади. Беҳбудий вафоти 7 йиллигининг кенг нишонланиши, шўро матбуотида Беҳбудийга бағишлиланган кўплаб мақолаларнинг эълон қилиниши, Самарқанд театрида бу “аср фожиаси” ҳақида ҳикоя қилувчи “Маърифат қурбонлари” спектаклининг намойиш этилиши, ниҳоят, 1926 йилда эса Қарши шаҳрига Беҳбудий номининг берилиши Шўро давлатининг Туркистон жадидлари отасига катта ҳурмат билан қараганини англатади. Бу фактлар: “Беҳбудий ким томонидан ўлдирилган?” деган саволга узил-кесил жавоб бергандек бўлади.

## Беҳбудий қаерга бормоқчи бўлган?

Беҳбудийнинг Қаршибегига Байтуллони зиёрат этиш мақсадида сафарга чиққани тўғрисидаги сўзлари тутқунликка учраган кишининг вазиятдан чиқиши учун топган баҳонасидан бошқа нарса эмас. Агар Беҳбудий шу мақсадда ёки бошқа бир номахфий иш юзасидан сафарга чиққанида Самарқандда қолган “ўртоқлари Сиддиқий, Айний, Фитрат, Қори ва Акобир Маҳдум”га, «ўғлонлари Вадуд Маҳдум, Абдулқодир Шакурий”га бу ҳақда айтган, жилла курса, бу кишилардан ақалли бирортаси унинг қаерга ва нима мақсадда кетаётганидан хабар топган бўларди.

Беҳбудийнинг қаерга ва нима мақсадда бормоқчи бўлгани ўша вақтда адабнинг маслакдош рафиқларини ҳам, ғоявий рақибларини ҳам баравар қизиқтирган. Ҳусусан, Ҳожи Муин шу ҳақда мулоҳаза юритиб, “Меҳнаткашлар товуши” газетасининг 1920 йил 8 апрель сонида бундай ёзган:

“Муфти Маҳмудхўжа ва рафиқлари сафарининг сири ва асбоби ҳеч кимга маълум бўлмай қолди. Булар бу сафардан мақсадлари нима эканлигини ҳеч бир кишиға англатамағонлар. Бу тўғрида халқ оғзиға тахминий кўп сўзлар тушди: “Булар ҳажға борар эмишлар”, ё “Булар Ҳиндистонга бориб инқилоб қилар

эмишлар”, ёки “Булар большевиклар тазиқидан қочмишлар” каби...

Ўзимнинг хусусий фикримча, бундай бўлса керак. Большевиклар исминдан Самарқандда ва Туркистоннинг бошқа шаҳарларида кўб тартибсизликлар бўлди. Баъзи бир ишларни муфти Маҳмудхўжа Беҳбудий маҳаллий ҳукуматга ё Тошкандға боруб, маъруза бериб, ислоҳ қилдируб келди. Осипуф воқеасидан сўнгра ҳеч ким ҳеч бир нарсани тингламайдурғон бўлди. Шўролар ҳукуматининг ҳақиқий пруғроми ва Москванинг хато ҳаракати Маҳмудхўжа ва Мардонқулларға маълум эди. Эҳтимол булар Москваға бориб, Туркистоннинг фожиали ҳолатини марказ ҳукуматга маъруза қилиб, ислоҳотни ражо қилмоқчи бўлсалар. Ўрунбург йўли боғлиқ бўлғони сабабли Қарши чўли устиндан Қофқозға ўтиб Москваға бормоқчи бўлсалар, (бу) зотларни танийдурғонга маълумдурки, булар ҳақ ва юрт манфаати учун ҳар бир таҳлиkanи кўзга оладурғон эдилар. Ҳар ҳолда бизнинг бу фикримиз бир зани ва тахминдур”<sup>1</sup>.

Беҳбудий, юқорида айтиб ўтганимиздек, 1918 йили Мусулмон маориф шўъбасига мудир, ўша йилнинг 9 майида эса маориф комиссари этиб тайинланган. Шу вақтда у мазкур лавозим тақозоси билан Самарқанддаги мактабларга тез-тез ташриф буюриб, бу мактаблардаги мажлисларда фаол иштирок этган. Лекин шовинизм оғуси билан заҳарланган кимсалар Беҳбудийни назар-писанд қилмай, унга нисбатан ҳақоратли муносабатда бўлганлар. Осипов қўзғолонидан кейин эса Самарқандда ноҳақлик авж олиб, ўзбек халқининг маданий-маърифий ва диний қадриятлари оёқости қилинган.

Шу йилларда Туркистоннинг мустақиллиги йўлида кураш олиб борган зиёлилар, бир томондан, Англия, иккинчи томондан, Туркия сингари давлатлардан ҳарбий ёрдам олмоқчи бўлганлар. Ўз навбатида, Туркистоннинг Россия тасарруфидан чиқиб кетишини истаган ва бундан манфаатдор бўлган давлатлар ҳам ўлқадаги мухолиф гурухлар билан алоқа ўрнатишга интилганлар.

<sup>1</sup> Қаранг: Сайдов Ҳ. Маърифат либосидаги озодлик. – Б. 135-136.

Беҳбудийнинг 1919 йил февралялида Тошкентга келиб кетиши ҳам, бизнингча, ана шу ҳар икки томоннинг бир-бири билан яқинлашиши йўлидаги саъй-ҳаракат эди. Бинобарин, унинг мақсади манфаатдор хорижий давлатлар билан алоқа ўрнатиш, улардан ҳарбий, моддий ва маънавий ёрдам олиш эди.

Беҳбудий, тахминимизга кўра, шу сафар чоғида Туркистон Мухторият ҳукуматининг барпо этилишида фаол иштирок этган маслақдош биродарлари билан учрашган. Улар икки гурухга ажralиб, Беҳбудий бошчилигидаги бир гуруҳ Самарқанддан, Мухторият ҳукуматининг ҳарбий нозири Убайдулла Хўжаев ва таниқли маърифатпарвар Саидносир Миржалиловдан иборат иккинчи гуруҳ эса Тошкентдан маҳфий равишда йўлга чиқиб, Бокуда учрашиш ҳақида келишиб олганлар.

С.Миржалиловнинг сирли равишда ғойиб бўлишидан хавотирга тушган оиласи аъзолари унинг ёр-дўстларига хат орқали мурожаат этиб, улардан оталари ҳақида маълумот беришни сўрашган. С.Миржалиловнинг ёш дўсти Ҳамза номига ёзилган хатлардан бирида бундай дейилади:

“Хурматли Ҳамза, Сиз бир хат ёзиб киргизгансиз: “Саидносир уйига келган”, деб. Ул бекор гап. Ҳар одам ҳар турли сўзлар суйли. Агар ул келган бўлса, бизлар Қўқонга ҳам Тошкентга одамлар юбориб ўтирас эдикми? Ҳамма душинмай, бизнинг устиндан инидийгина сўз сўзламий. Бизла шул сўзга қараб ўлмай, тирик ўтирамиз. Ҳеч бир хабар эшитмай, кўзимиздан қон-ёш тугуб, куни-туни хафа турамиз. Агар тирик бўлуб Носир келган бўлса, Сиздан қочурмаёқ қуяр эдик, чунки Сизни душман деб ўтирганимиз йўқ... Қони ул тирик бўлуб, олдимизга келса. Бизлар они кўзимиз билан кўрсак, худога минг шукрлар қилсакда, оз бўлур”<sup>1</sup>.

Маълум бўлишича, С.Миржалилов шу вақтда Бокуга етиб бориб, Беҳбудийнинг келишини кутган. Беҳбудий белгиланган вақтда келавермагач, у ташвишланиб, Бухоро ва Самарқанддаги

---

<sup>1</sup> Ҳамза ғакимзода архивининг каталоги, 2-том. – Тошкент, 1991 йил. – В. 309.

биродарларига хат орқали мурожаат этган.

С.Миржалилов 1925 йил 20 декабрда бўлиб ўтган тергов пайтида шу ҳақида бундай сўзларни айтган:

“Кўқон Мухторият ҳукумати тарқатилганидан кейин мен Халқ кенгаши аъзоси ва (Мухториятнинг) хазиначиси сифатида яширинишга мажбур бўлдим. Дастлаб Туркистондаги уйимда яшириниб яшадим, кейин Тошкентга келиб, Куропаткин кўчасидаги уйимда истиқомат қилдим... Тошкентда кўп бўлмай, Красноводск орқали Кавказга бордим. Бу воқеа тахминан 1918 йилнинг мартада рўй берган.

Кўқон мухториятнинг бошқа қатнашчиси – Мустафо Чўқаев эса Россияга борди, Обиджон Маҳмудов ҳам худди шундай йўлни тутди. Мен бўлсам, Красноводск орқали тўппа-тўғри Астрахонга бориб, у ердан Москвага йўл олдим. Мен у ерда Маҳмудовни учратиб, у билан битта меҳмонхонада турдим... Маҳмудов ўзининг савдо ишлари билан машғул бўлди. Убайдулла Хўжаевнинг қаерда яшайтганини билмас эдим. Кейин ўзидан эшитсан, Тошкентда яшириниб яшаган экан.

Мен Москвадан Киев ва Одесса орқали Истанбулга бордим. Истанбулга борганимда, 1918 йилнинг ёз ойлари бўлиб, шу пайтда ҳокимият тепасида Анвар пошо турарди. Мен меҳмонхонада яшадим. Ўша вақтда Истанбулда Нуриддинбек Худоёрхонов, Фози Юнусов (татар) ҳам ўша ерда эдилар. Мен Истанбулда эканимда Садриддинхон ҳам келди, бир ўзи. Шерали Лапинни ҳам, Нуриддинхўжа Мусабоевни ҳам у ерда кўрмадим. Мен ўша сафар чоғида Истанбулда бир неча ой яшаб, кейин Ботум орқали инглизлар босиб олган Бокуга қайтиб келдим...»<sup>1</sup>

С.Миржалилов ва унинг юқорида номлари зикр этилган маслакдошлари большевиклар тазиикидан қочиб эмас, балки уларга қарши курашни бошқа бир жабҳада давом эттириш ва хориждан мадад олиш мақсадида Туркияга борганлар. Акс ҳолда у Боку орқали яна Тошкентга қайтиб келмаган, орадан маълум вақт ўтгандан кейин эса яна Туркияга йўл олмаган бўларди.

---

<sup>1</sup> Тергов материалларидан.

Тахминимизга кўра, С.Миржалилов ва унинг маслақдош дўстлари Истанбулда Туркистондаги истиқолчилик ҳаракатига ёрдам бериши мумкин бўлган кишилар билан учрашганлар. С.Миржалилов эса Туркияда ишлаб чиқилган режага мувофиқ Тошкентга қайтиб келган. У Тошкентда, бир томондан, Беҳбудий сингари истиқлол фидойилари, иккинчи томондан, Бейли сингари инглиз разведкаси вакиллари ёки уларга яқин шахслар билан учрашган. Шундай учрашувлар пайтида Беҳбудийнинг сўнгги сафарига алоқадор масала ҳам муҳокама этилган бўлиши мумкин.

С.Миржалилов Тошкентга қайтиб келганидан кейин Туркистонга бориб, икки ҳафтага яқин оиласи бағрида яшайди. Сўнг Тошкентга қайтиб, дастлаб Эски Бухорога боради, кейин Когонда бир ҳафта яшаб, яна Красноводск орқали Бокуга жўнайди. Бокуда эса бир ой қолиб кетади. Бунинг сабаби, бизнингча, шундаки, у Бокуда Беҳбудий гуруҳи билан учрашиши ва шу гуруҳ билан биргалиқда Туркия орқали Антанта давлатлари раҳбарлари билан учрашувга бориши лозим эди.

С.Миржалилов Беҳбудийнинг белгиланган муддатда Бокуга етиб келмаганидан қаттиқ хавотирга тушади. Юқорида айтиб ўтганимиздек, у Бухоро ва Самарқанддаги ёр-дўстларига мурожаат этиб, Беҳбудийнинг тақдири ҳақида маълумот беришларини сўрайди. Наим афанди (Беҳбудийнинг Туркия фуқароси бўлганлиги сабабли тирик қолган яккаю ягона ҳамроҳи) Бокуга етиб келгач, С.Миржалилов даҳшатли фожия ҳақида хабар топиб, Истанбулга Беҳбудийсиз боришга мажбур бўлади.

Фози Олим Юнусов шу вақтда Нуриддинбек Худоёрхонов билан Истанбулда туркистонлик биродарларини кутаётган эди.

Ф.О. Юнусов 1937 йил 25 декабрда терговчининг Туркияга нима мақсадда борганлиги ҳақидаги саволига жавоб бериб, бундай деган:

“Мен Нуриддинбек Худоёрхонов билан бирга Туркия хукумати ҳамда “Иттифоқ ва тараққий” партияси билан

учрашиш, улардан Туркистонни Шўро Россиясидан ажратиб олишга қаратилган ишимизда ёрдам ва кўрсатмалар олиш учун борганман. Мен хавфсизлик нозири Азизбей орқали Талъат пошога мурожаат этганимда, у мен билан Садносир Миржалиловга Туркистонни Шўро Россиясидан ажратиб олиш масаласини Миллатлар Лигаси олдига қўйиш лозим, деди ва бунинг учун Женевага боришимни маслаҳат берди”.

F.O. Юнусовнинг яна тергов пайтида айтишича, Талъат пошо туркистонликларга ёрдам тариқасида фақат Кўпрулузодани ҳамроҳ сифатида қўшиб беражагини айтган. Аммо туркистонликлар Женевага боришга рози бўлмаганлар.

С.Миржалилов ва F.O. Юнусовнинг тергов материаларида уларнинг Туркияга боришдан кўзлаган мақсадига ойдинлик киритувчи бошқа маълумот йўқ. Ҳар иккала мухториятчи Туркистонни большевиклардан озод этиш билан, бинобарин, Беҳбудийнинг сўнгги сафари билан боғлиқ мақсад ва режаларини ошкор этмаганлар.

## Беҳбудийни ким ўлдирган?

Сўнгги йилларда Беҳбудий ўлими сирларини ўрганиш билан фаол қизиққан ва бир неча мақолаларни эълон қилган журналист ва адабиётшунос Ҳалим Сайднинг ёзишича, Беҳбудийнинг ғойиб бўлганлиги ҳақидаги илк расмий хабар улар чиқиб кетганларидан бир ой кейин “Меҳнаткашлар товуши” газетасининг 1919 йил 23 апрель, иккинчи хабар эса ўша йилнинг 20 ноябрь сонларида берилган. Сўнгги хабарда, жумладан, эътиборга молик бундай маълумотлар бўлган:

“Темурхон афанди (Ҳалим Сайднинг ёзишича, Биринчи жаҳон уруши арафасида Истанбулга ўқишига борган самарқандлик – H.K.) берган маълумотга кўра, Беҳбудий афанди Самарқанддан чиқиб, Бухоро музофотидан ҳибс қилинғони ҳамон бу хабар Бокуда шойиъ (маълум) бўлғон. Бокуда турғувчи туркистонли Сайд Носир исмли бир зот бир восита топиб, Бухородан Беҳбудий

ҳақинда маълумот сўраб, тахлиси (халос қилиш) учун қўшиш (харакат) қилғон. Лекин бу ҳақда Бухородан ҳеч бир хабар ола олмағон.

Бу мавсуқ (аниқ) хабардан маълум бўлурки, мундин бурунроқ Москвадан келиб, “Иштирокион” газетаси идорасинда “Беҳбудий афанди Қофқозда экан”, деб хабар берган И.М. афандининг сўзи ҳам, Хорижия комиссарияти воситаси-ла Мусулмон ўлка бюросининг Беҳбудий афанди ҳақинда сўрағон саволига Бухоро ҳукуматининг “Махмудхўжа Беҳбудийни ҳибсдан чиқариб, узатиб эдик”, деб берган жавоби ҳам шубҳали хабарлар қисминдандур”<sup>1</sup>.

Ушбу кўчирмада қайд этилганидек, Ўлка мусулмон бюроси Беҳбудийнинг тақдири ҳақида маълумот беришни сўраб, Хорижия комиссарлиги орқали Кушбегига мурожаат этган. Аммо Кушбегидан ўз вақтида жавоб келмаган ва Ўлка мусулмон бюроси РСФСРнинг Бухоро амирлигидаги Мухтор вакилидан шу масалада ёрдам беришни илтимос қилган. Мазкур вакил ўша йилнинг 4 августида Кушбегига Беҳбудий ҳақида маълумот беришни сўраб хат ёзган. Мухтор вакил бу хатга жавоб ололмаганлиги сабабли 14 августда Кушбегига қуидаги хат билан иккинчи маротаба мурожаат этишга мажбур бўлган:

“РСФСР

Россия ва Туркистон Республикалари Мухтор вакили

19 й. 14 август

№ 3004

*Муҳтарам Кушбеги*

*Усмонбек бий Деванбегига*

---

<sup>1</sup> Ҳалим Сайид. Мажбурий “ҳаж” тафсилотлари, - Ўзбекистон адабиёти ва санъати, 1995 йил 14 апрель.

*Дўстлик ҳурмати Сиз, мұхтарам Қушбегидан 4 августда  
2754 рақамли хатда сўраганим Беҳбудийни ҳибсга олиш  
сабаблари ҳақида менга тезроқ маълумот етказиши борасида  
фармойиш бершингизни илтимос қиласман.*

*Сизга сиҳат-саломатлик ва Амир Жаноби Олийларига эзгулик  
тилайман.*

*Бухоро ҳонлигидаги Муҳтор вакил  
Девон Бошқарувчиси номидан  
(имзо)<sup>1</sup>.*

Қушбеки Фавқулодда вакилнинг мазкур хатига қуидаги жавобни йўллаган:

*“Бухоро ҳонлигидаги Муҳтор вакилга  
Бухоро Қушбегисининг 17 августдаги 775 рақамли хати  
(нусхаси)*

*Сизнинг 1919 й. 10 июлдаги 2560 рақамли Маҳмуд Хўжса  
Беҳбудий, Мулла Муҳаммад Ўрунбоев ва Мардонқул  
Шоҳмуҳаммедовга доир хатингиз муносабати билан мен  
Қаршибегига уларнинг ҳибсга олиниш сабабларини хабар қилишини  
топширдим. Зикр қилинган бек менга зикр қилинган шахсларнинг  
аҳоли ўртасида ғалаён қўтарилиган пайтда чегарани кесиб  
ўтганларини хабар қилди; чегарада турган қўриқчилар уларни  
ушлаб, бекнинг ҳузурига олиб борганлар. Уларни сўроқ қилиш  
пайтида шу нарса маълум бўлганки, саёҳатчилар сажда қилиш  
учун Маккага бормоқчи бўлган эканлар, натижада зикр қилинган  
бек уларни ушлаб қолган ва шу тўғрида Амир жанобларига хабар  
қилган. Жаноби олийларининг ижозатлари билан зикр қилинган  
саёҳатчиларнинг ўз йўлларида давом этишларига руҳсат*

---

<sup>1</sup> 1 збекистон Марказий Давлат архиви, 1-126-фонд, 2004-  
иш, 4-вараৎ.

берилган. Шундан кейин улар, бекнинг хабар қилишига қараганда, қамоқда ушлаб турилганлари учун Қарши беклигидан эркин чиқиб кетганлар.

*Бухоро Қушбегиси.*

*Тӯғри: бўл(им) мудири (имзо)”<sup>1</sup>.*

Мазкур жавоб хати тагида унинг Тошкентда, Туркистон

Хорижия комиссарлиги Иш бошқармаси томонидан 1919 йил 1 сентябрда олинганлиги қайд этилган.

Энди бир сонияга бўлса ҳам, 1918 йил март ойидаги қонли воқеаларга қайтсак.

Шармандали мағлубият туфайли талвасага тушган Ф.Колесов битим тузиш мақсадида амир ҳузурига чор маъмурларидан Введенский билан Ҳайдар ҳожи Мирбадаловни элчи қилиб юборади. Амир Колесовнинг таклифига жавобан агар у **Файзулла Хўжаев, Фитрат ва Абдувоҳид Бурҳоновни тутиб берсагина** Туркистон ҳукумати билан битим тузишга рози эканлигини айтади.

Кўрамизки, амир ўч олмоқчи ва жазоламоқчи бўлган «Ёш бухороликлар» орасида Беҳбудийнинг номи учрамайди. У шу кезларда амир эмас, балки Шўро ҳокимияти ва бу ҳокимиятнинг Туркистондаги раҳбарлари учун ўта хавфли шахс эди.

Шундай қилиб, Кушбеги Беҳбудийнинг Қаршибеги қамоқхонаси (зиндони)дан озод этилганини айтиб, Беҳбудий ўлимининг Бухоро амири буйруғи билан қатл этилгани ҳақидаги версияни рад этгандек бўлади.

Шу нарса маълумки, 1920 йилнинг март ойида Беҳбудий ўлими тафсилотларини текшириш бўйича етти кишидан иборат комиссия тузилган, Беҳбудийнинг таъзия маросимини ўтказиш

ва оиласига ёрдам бериш учун эса 90 минг сўм миқдорида иона йиғилган. (Бу ҳақдаги маълумотлар ва комиссиянинг хulosаси “Меҳнаткашлар товуши” газетасида чоп этиб борилган.)

“Комиссиянинг бу хулоса-мақоласи, - деб ёзади Ҳалим Сайид, - жуда катта аҳамиятга эга. У бизга бир қанча сирсиноатларни очиб беради. Чунки, Беҳбудийнинг Туркистондан чиқиб кетиш арафасидаги аҳволи, ҳаракатлари бизга қоронғи эди. Негаки, 1918 йилнинг июнь ойида “Хуррият” газетаси тўхтатилгач, биз матбуотда Беҳбудийнинг мақолаларини учратмаймиз. Унинг сукути қандайдир “заҳар тилар муҳит”дан (Чўлпон) хабар берса-да, лекин бу муҳитни фош қиласидиган бир тарихий ҳужжат топа олмадик. Хўш, 1918 йилдан 1919 йил март охиригача Самарқандда не ҳоллар содир бўлган? Бу ҳақда комиссиянинг “Махмудхўжа Беҳбудий ҳазратларининг қисқача таржимаи ҳоли” сарлавҳали хулоасини ўқисак, масала ойдинлашади”<sup>1</sup>.

Ҳалим Сайид шу сўзлардан кейин юқорида қайд этилган воқеа - Беҳбудийнинг 1918 йилда Мусулмон маориф шўйбасига мудир этиб тайинлангани, лекин шовинистларининг камситишлари орқасида истеъфога чиққани ҳақидаги “Хулоса”дан олинган маълумотни баён қиласиди. Сўнгра ёзади:

“Беҳбудий “Хуршид” газетасида ўзининг ўн йил аввал ёзган мақоласида социалистлар ҳокимиёт тепасига келса, не ҳол юз беришини айтган эди. Кейинчалик Беҳбудийнинг бу гаплари ўз номининг истеъмолдан бутунлай олиб ташланишига асос бўлди. Хусусан, М.Ваҳобовнинг “Ўзбек социалистик миллати” (Тошкент, 1960) китобида шундай сўзларни ўқиши мумкин: “Социалистларнинг программаси, Беҳбудий фикрича, ислом қоидаларига зид бўлгани учун мусулмон меҳнаткашлар бу партиядан қочишлири керак эмиш. Уларнинг программаси, дейди

<sup>1</sup> Ҳалим Сайид. Мажбурий «<sup>3</sup>аж» тафсилотлари. - ша  
манба.

Беҳбудий, ҳозир амалга ошиши мумкин бўлмаган хаёлотдан иборатдир. Агар бир фалокат бўлиб, уларнинг программаси амалга ошиб қолса, қиёмат қойим бўлармиш (211-бет)<sup>1</sup>.

Агар орадан қирқ бир ўтгандан кейин маҳаллий аҳолидан чиққан шўро тарихчиси Беҳбудийга шу қадар маломат тошларини отган бўлса, унинг 1919 йилдаги салафлари Беҳбудийни Бухоро амири одамларига тутиб бермагани ёки ўзлари ўлдирмаганига қандай ишониш мумкин?!

Атоқли адабиётшунос олим Иззат Султон ўзининг илмий фаолиятини профессор Фитрат раҳбарлиги остида бошлаган. Иззат Султон, кунларнинг бирида, Беҳбудийнинг ўлими тўғрисида баҳс бораётган кезларда бизга бундай сўзларни айтган эди: “Фитрат Беҳбудийнинг ўлимида Бухоро амирини эмас, балки Туркистондаги Шўро ҳокимиятини айбдор, деб билар ва дориломон замонлар келганида ана шу ҳақиқатнинг юзага чиқишини истар экан. Унинг айтишича, Беҳбудийни ГПУ агентлари Бухоро амирининг жоҳил одамларига тутиб беришган. Шўро давлатининг Беҳбудийни амир қўли билан ўлдиришдан кузатган мақсади эса, Фитратнинг айтишича, бир томондан, “Ёш бухороликлар”да амирга нисбатан қаҳр ва нафрат тўлқинини уйғотиши, иккинчи томондан, “Ёш бухороликлар” ёрдамида Бухоро амирига қарши юришни бошлаш, амирликни тугатиш ва уни Шўро ҳокимияти таркибиға қўшиб олиш эди”<sup>2</sup>.

Беҳбудий фожиали ўлими сабабларининг Фитрат томонидан берилган бу талқини, бизнингча, ҳақиқатга анчагина яқин.

Дарвоҷе, хорижий журналларнинг бирида Беҳбудий ўлими муносабати билан бундай сўзлар ёзилган:

“Беҳбудий ташабbusларидан хабардор бўлиб турган Туркистон миллий ташкилоти ўз умидларини унинг

---

<sup>1</sup> Ғалим Сайийд. Мажбурий «<sup>3</sup>аҳ» тафсилотлари. - 'ша манба.

<sup>2</sup> Иззат Султоннинг 70-80-йилларда биз билан бир неча бор ҳизлган су<sup>3</sup>батидан.

ҳаракатларини муваффақиятли чиқуви томон қаратдилар. Иш ва истаклар Беҳбудий кутганича бўлиб чиқмади. Ул Қарши шаҳаринда ўз вазифаларини ўринлов ҳаракатида экан, қизил Русиянинг Бухоро элчихона хизматчиси Уткин воситаси-ла амир томонидан тутилди. Беҳбудий амирнинг Қарши шаҳариндаги волийси Нуриддин Оғалиқ томонидан 25 март 1919 йилда ваҳшиёна ўлдирилди. Беҳбудий “жадидчи” дея айбланиб, амирнинг буйруғи-ла ўлдирилди. Бу эса ниқоб эди. Ҳақиқатда эса Беҳбудийни амир воситаси-ла рус большевикларининг совет комиссариати томониндан уюштирилгани аниқланди. Буни собиқ “Туркистон совет жумхурияти”нинг ҳарбий министри Осипов 1919 йил Бухорога қочган вақтинда “Ёш бухороликлар” жамиятинда берган баёнотида билдирган эди.

Туркистон халқи бул усулда бундан 31 йил аввал ўзининг буюк жамоат ва сиёsat ходимидан айрилди”<sup>1</sup>.

Ушбу янги маълумот ҳам Фитратнинг: “Шўро ҳокимияти Беҳбудийни Бухоро амирининг қўли билан ўлдирган”, деган сўзлари тўғри эканини тасдиқлаши мумкин.

**Яна комиссия хulosаларига қайтсан...** “Осипуф воқеасидан сўнгра Самарқандда кўб талон-торожлар бошланди. Ноҳақ ҳибслар кўпайди... Халқнинг ҳиссиёти динияси таҳқир қилинди. “Бу ишларга бир чора топа оларманми?” деб 1919 йил февраль ойинда Тошкандга борди. Лекин бу сафардин ҳеч бир натижа қўлга киргуза олмади. Шундан сўнгра ҳеч бир кишига англатмасдан, маслакдош ва фикрдошлари... билан 25 март ойинда, 1919 йил, асрорангиз бир суратда Самарқанддан ғойиб бўлди. Орадан бир ҳафта ўтгандан кейин буларнинг Қарши йўли билан сафарга чиқғонлари, Қарши шаҳридан Бухоро ҳукумати тарафиндан ушланиб, ҳибсга олинғонлари шойиъ бўлди. Мундин сўнгра мухталиб (хилма-хил) хабарлар кўб эшитилди...”<sup>2</sup>

---

<sup>1</sup> «Миллий Туркистон» журнали, 1950 йил, 66-сон. - Б. 23.

<sup>2</sup> маранг: Ғалим Сайид. Мажбурий заж тафсилотлари. - 'ша манба.

Демак, Беҳбудий 1919 йил 25 марта яширин равиша Самарқанддан ҳамроҳлари билан сафарга чиқиб, бир ҳафталик йўлдан сўнг 1-2 март кунлари Қарши шахрига етиб келган ва қўлга тушган. Комиссия аъзолари томонидан аниқланган бу маълумот Ҳожимурод Худойберди ўғлиниң “Беҳбудий афанди ва йўлдошлари бошлаб Шаҳрисабзда қўлга тушиб, тахминан икки ойдан сўнг Қарши шахрига юборилиб, онда бир неча кун ётқондан кейин... шаҳид қилинғон”лиги тўғрисидаги хабарини рад этади.

Умуман, “васиятнома”га ишониш мумкинми? Ҳожи Муинга Беҳбудийнинг ўлими ҳақидаги маълумотни келтирган “ўртоқ Ҳожимурод” ким бўлган? Гёё унга Беҳбудий ўлими тафсилотларини айтган Содиқжон-чи?..

Аввало айтиш лозимки, Беҳбудийнинг ғойиб бўлганлиги ва мужмал тақдири тўғрисидаги дастлабки хабар “Меҳнаткашлар товуши” газетасининг 1919 йил 23 апрель сонида эълон қилинган. Иккинчи хабар яна шу газетанинг 1919 йил 20 ноябрь сонида босилган. Шу икки сана ўртасидаги вақтда, юқорида кўрганимиздек, расмий идоралар томонидан Беҳбудийни қидирув ишлари олиб борилган. “Васиятнома”да тилга олинган “ўртоқлар” ва “ўғлонлар”нинг шу вақт давомида устозлари тақдири билан қизиқсанликлари тўғрисида бирор маълумот йўқ. С.Айний, Фитрат ва Чўлпоннинг Беҳбудийга бағишланган шеърларидан шу нарса маълум бўладики, улар устоз вафотидан кейин бир йил ўтгандан кейингина унинг қабрини ахтаргандар.

Худди шу кунларда етти кишидан иборат комиссия тузилган ва бу комиссия Беҳбудий вафоти тафсилотларини аниқлаш юзасидан қўлидан келган барча ишларни қилган. Беҳбудий вафотининг уч йиллиги муносабати билан “Зарафшон” газетасининг 25 март сонида Ҳожи Муин, А.Азamat, А.Азимий ва Ниҳоний тахаллусли муаллифнинг Беҳбудий

---

тўғрисидаги мақолалари, “Инқилоб” журналиниң 1-сонида эса юқорида тилга олинган “vasiyatnomasi” Ҳожи Муин шарҳлари билан бирга эълон қилинган.

**Энди Ҳожимурод Ҳудойберди ўғлига келсак.** Ҳожи Муиннинг ёзишича, “ўртоқ Ҳожимурод” Бухоро инқилоби бошланган кунда, яъни 1920 йил 28-29 августда “Самарқанддан хукумат томонидан бир маъмурият ила Шаҳрисабз ва Китоб тарафлариға бориб, андин бир иш ила Қарши шаҳариға ўтқан ва ўшал ерларда 6-7 ой (демак, 1921 йилнинг март-апрель ойларига қадар – Н.К.) хизмат қилиб юрған”. Ҳожи Муин тилга олган даврда Бойсун ва Шаҳрисабзда М.Монстров қўмондонлигидаги рус дивизияси шўроларга қарши бош кўтарган амир қўшинларига қарши жанг олиб бориб, уларни 1920 йил 21 декабрда тор-мор келтирган<sup>1</sup>. Ҳожимурод эса ана шу қўшин таркибида хизмат қилган.

Ҳожи Муиннинг ёзишича, Ҳожимурод Қарши бегида бир неча вақт “маҳрамлик” хизматида бўлган фарғоналик 17 яшар Содикжондан гўё Беҳбудий ва йўлдошларининг Шаҳрисабзда кўлга тушганлиги, амирдан уларни қатл қилиш ҳақида буйруқ келганлиги ва Беҳбудийнинг қандайдир Аҳмад орқали унга васиятнома ёзил берганлигини айтган. “Ўртоқ Ҳожимуроднинг сўзига кўра, - деб ёзади Ҳожи Муин, - мазкур Содикжон 1920 йилда 21 декабрда (эътибор беринг: амир қўшини тор-мор этилган кунда – Н.К.) амир томонидан Шаҳрисабз, Китоб ва Гузор тарафларида қўзғатилган аксилҳаракатчилик вақтида исёнчилар тарафидан (?) Шаҳрисабзда ўлдирилғон. Шунинг ила Содикжон ёзған воқеа ва васиятноманинг асл нусхаси-да ўшал чоғда йўқолиб кетган»<sup>2</sup>.

<sup>1</sup> маранг: Победа Октябрьской власти в Средней Азии и Казахстане. – Ташкент, 1967. – С. 594.

<sup>2</sup> Кўчирма “vasiyatnomasi”нинг “збекистон адабиёти ва санъати” ғафталиги (1988 йил 16 сентябрь) да адабиётшунос Шерали Турдиев томонидан эълон ғилинган матнидан олинди.

Агар Содикжон деган шахс ҳақиқатда яшаган ва Қарши бегида “маҳрамлик” қилган бўлса, у Шахрисабзда амир қўшини таркибида “қизил”ларга қарши курашган ва Ҳожимурод хизмат қилган қизил қўшин билан жанг пайтида ҳалок бўлган.

“Васиятнома” илк бор “Меҳнаткашлар товуши” газетасининг 1921 йил 29 март сонида чоп этилган бўлиб, унда: “Ҳожимурод афандининг ўзи ҳам мазкур вақтда 15 нафар одами ила қўлға тушғон экан. Лекин буларға эртаси шўро ҳукуматининг аскарлари бориб қутқарғонлар ва исёнчилар ила амир одамларини маҳв ва паришон этганлар”<sup>3</sup>, деган маълумот ҳам бўлган. Аммо нима сабабдандир “Инқилоб” журнали бу сўзларни тушириб қолдирган.

Таниқли адабиётшунос Солих Қосимов 60 - 70-йилларда Беҳбудий ва унинг ўлими тафсилотларидан хабардор кишилар билан учрашиб, бизни қизиқтирган шахс ҳақида бундай янги маълумотни топган:

“...Бухоро халқ инқилобининг ғалабасидан кейин, - деб ёзган эди у “Беҳбудий ва жадидчилик” деган мақоласида, - яъни Беҳбудий пинҳоний қатл этилганидан кейин бир йилдан мўлроқ вақт ўтгач, Қарши шаҳрида қизил гвардиячилар тўдасида қўмондонлик қилган самарқандлик Ҳожимурод Худойбердиев маҳаллий аҳоли ўртасидаги Беҳбудийнинг қатл этилишидан хабардор кишиларнинг хотираларини эшитади ва Самарқанд Советини хабардор қиласи. Тегишли партия ва давлат ташкилотлари томонидан бу фактлар текширилгач, бутун Туркистон бўйлаб мотам кечалари ўтказилади, вақтли матбуотда рус ва ўзбек тилларида Беҳбудийнинг фаолияти ҳақида мақолалар босилади, унинг “Падаркуш” пьесаси саҳналаштирилади”<sup>1</sup>.

<sup>3</sup> Ғалим Сайид. Мажбурий «<sup>3</sup>аж» тафсилотлари. - ша манба.

<sup>1</sup> «‘збекистон адабиёти ва санъати», 1990 йил 19 январь. [www.ziyouz.com](http://www.ziyouz.com) kutubxonasi

Бу сўзларга қўшимча тарзида шуни айтиш жоизки, “ўртоқ Ҳожимурод” Беҳбудийнинг ўлими ҳақида “Маърифат қурбонлари” пьесасини ёзган ва бу пьеса, Ҳалим Сайиддининг аниқлашига кўра, 1920 йилнинг охири – 1921 йилнинг бошларида сахнага қўйилган.

Агар Солих Қосимовнинг мазкур сўзларига эътибор қаратсак, ҳеч қандай Содикжон ҳам, “vasiyatnomा” ҳам бўлмаган. “Маърифат қурбонлари” пьесасидаги Беҳбудийнинг ўлим олдидағи монологи эса, бизнингча, Шўро ҳокимияти махфий хизматининг саъй-ҳаракати билан Беҳбудийнинг “vasiyatnomा”си сифатида тарқатилган. Агарда бу “vasiyatnomा”нинг бирорта сўзи рост бўлганида у, бизнингча, табаррук ҳужжат сифатида Беҳбудийнинг С.Айний, Фитрат, Чўлпон сингари садоқатли дўстлари ва шогирдларининг асарларида тилга олинган бўларди.

**Беҳбудий қаерда дағн этилган?** Ҳожи Муиннинг “vasiyatnomा”га ёзган шарҳларида бундай сўзлар бор:

“Бу васиятномадан 3-4 кун ўтар-ўтмас, бек Беҳбудий афанди ва йўлдошларини ҳам Аҳмад (бекнинг маҳрамларидан бири – Н.К.) ни ўлдурурға буюргон ва алар **зинданнинг ёнидағи подшоҳлик бир чорбоққа** (таъкид бизники – Н.К.) юборилғонлар. Шунда аларнинг қотиллари ўзларига билдирилган ва ўзлари учун **шу боғда тўрт қабр қаздирилғон** (таъкид бизники – Н.К.). Сўнгра Беҳбудий афанди ва йўлдошлари таҳорат олиб, намоз ўқимоқчи бўлғонлар. Лекин шу чоқда раҳмсиз жаллод муовинлари ила етушуб келиб, аларни намоз ўқирға қўймағон ва энг аввал Беҳбудий ҳазратларини жойнамоз устида бошини кесган. Бу ҳолни кўриб, Мардонқули Муҳаммадқули ва Аҳмад афандилар тавҳид ва шаҳодат калималарини ўқиб, ўлимни кутиб турғонлар. Андин кейин жаллод аларни бир-бир бошин кесган. Сўнграbeknинг хизматкорлари мазкур шаҳидларининг наъш (жасад)ларини чиқариб, ўзлари қазғон қабрларга кўмганлар ва

қабрларини (билинмасун, деб) ер ила текиз этганлар”<sup>2</sup>.

1920 йилнинг март ойида тузилган 7 кишилик комиссиядан ташқари, ўша йилнинг 27 сентябрида Самарқанддаги Эски шаҳар маданий-маърифий ташкилотларининг “фавқулодда бирлашган йифилиши”да яна 5 кишилик комиссия тузилиб, унга Бухоро музофоти ва бошқа жойларда тергов ишларини олиб бориш, қотилларни ахтариб топиш ва қамоқقا олиш, марҳумларнинг жасадларини топиб, Самарқандга олиб келиш вазифаси топширилган. Фавқулодда ваколатлар берилган бу 5 кишилик комиссияга Мирза Абдуқаюм Ширинбоев (инқилобий трибунал раиси), Эргаш Орифбоев, Раббимқул Солиҳов (инқилобий трибунал аъзолари), Кўёнбай Абдухолиқов ва Абдумажид Зокирийдан ташқари, яна 2 нафар маҳфий агент ҳам киритилган. Ўша йилнинг ноябрь ойида эса Самарқанд ёшлари яна бир комиссия тузиб, уни Бухоро Халқ Жумхурияти ёрдамида Қаршига юборгандар. Аммо бирорта комиссия ўз олдига қўйилган вазифани бажара олмаган. **“Қарши шахрининг хукумат бошида ўлтиргон одамлар” бу комиссияларга ишлаш имконини бермаганлар (таъкид бизники – Н.К.).**

«Мусоғир» тахаллусли муаллиф (С.Айний)нинг яқинда ёш тадқиқотчи Нилуфар Намозова томонидан эълон қилинган “Муфти Маҳмудхўжа Беҳбудий ва рафиқларининг олинди ўчлари” номли мақоласида бизни қизиқтирган масалага доир бундай янги маълумот берилган:

«Маҳмудхўжа Беҳбудий афандининг қабри бу кунда топилиб, устига ҳайкал ишланиб ётадир.

**Беҳбудий ўзининг ўртоқлари билан ҳибсонада ўлдирилиб, ҳибсонанинг вогзалға қарағон тарафда ҳаммаси бир қабрга қўмулганлар (таъкид бизники – Н.К.).**

<sup>2</sup> Ушбу к° chirma «vasiyatnomalarining "Milliliy uйfoniш" (1993) т° plamidagi нашридан олинди. – B. 126-127.

Беҳбудий ва рафиқларининг қабрини излаб топиб, устига ҳайкал ишлатишда Қарши вилоят ижроқўми билан вилоят фирмўмининг бошида ўлтирифон Жўра Зокирий ва Назариф ўртоқлар кўб ғайрат қилғонлар”<sup>1</sup>.

Бу хабар “Бухоро ахбори” газетасининг 1923 йил 3 октябрь сонида босилган.

Мазкур сенсацион хабардан кейин ҳам Беҳбудий ва ўртоқларининг қаерга дафн этилгани масаласи ҳамон ечилмай келади.

Чўлпоннинг Беҳбудий хотирасига бағишлиланган шеърида бундай сатрлар бор:

Амалимнинг юлдузиким, қўз тикди  
Қора, жирканч, ўлим кони - ерларга.  
Савол бердим: “Йўқотганим қайда?” -  
деб

**Ўзимни ҳам ютмоқ бўлган  
эрларга<sup>2</sup>.**

(таъкид биизники. – Н.К.)

1920 йилда ёзилган бу шеърда Беҳбудий қабрини ахтариш нечоғлик хавфли эканини Чўлпон аниқ-тайин айтган. Модомики, Беҳбудий қабрини ахтариш Бухоро амирлиги тутатилганидан кейин ҳам хавфли бўлган ва бу хайрли ишга 20 – 30-йилларда ҳам имкон берилмаган экан, демак, уни ва ўртоқларини маҳв этган қотилнинг кимлиги аниқ. **Бу, 1937 иили Қарши шаҳридан ва қўплаб мактаблардан Беҳбудий номини олиб ташлаб, ниҳоят, ўзининг қонли қиёфасини кўрсатган мустабид Шўро ҳокимиятидир.**

**“Беҳбудий қаерга бормоқчи эди? “Катта шўро энциклопедия”<sup>1</sup>сида баён қилинган маълумотга қараганда, Туркистон Мухторият ҳукуматининг собиқ раҳбарлари большевизмга қарши курашларида ёрдам беришни сўраб, АҚШ президенти Вильсонга мурожаат этганлар. Ўз навбатида Вильсон «Ўнлар кенгаси»нинг топшириғига биноан, Париж Тинчлик кенгашининг бошланиши (1919 йилнинг январь ойи)да Шўро Россиясида курашаётган барча мухолиф гуруҳларга хат йўллаб, уларнинг раҳбарларини Шаҳзода ороллари (Туркия) да ўтказилажак конференцияга таклиф этган. В.Вильсоннинг Виржиния университети (АҚШ) даги архивида сақланаётган маълумотга қараганда, Америка президентининг мазкур масалага оид сўзи 1919 йил 22 январда тузилган ва радио орқали ўқилган. Мазкур матнга қараганда, Вильсон Россиядаги мухолиф кучларнинг вакиллари билан бирга Россия раҳбарларини ҳам Шаҳзода оролларида бўлажак учрашув-конференцияга таклиф қилган. Аммо Россия бу таклифи рад этган.**

Тахминимизга кўра, М.Беҳбудий ва С.Миржалилов ҳамроҳлари билан бирга ана шу учрашув-конференцияда иштирок этиш учун 1919 йилнинг март ойида йўлга чиққан эдилар.

Махфий архивлардаги шу даврга тегишли хужжатларни яхши ўргангандан М.Ваҳобов эса бошқа фикрни олға суради:

“Парижда, - деб ёзган у, - 1-Жаҳон уруши ғолиблари – Антанта давлатлари ўртасида Версаль конференцияси давом қилаётган пайтда “Миллий иттиҳод” ташкилоти топшириғига мувофиқ маҳаллий миллатчилардан бир группаси Парижга юборилди. Беҳбудий ва Мардонқул Бухоро орқали Эронга ўтиб, у ердан Парижга бормоқчи бўлиб йўлга чиқди. Уларни Бухоро амири Қарши шаҳрида қамоққа олди ва ўлдирди”<sup>2</sup>.

<sup>1</sup> Большая советская энциклопедия, том 32. – Москва, 1955. – С. 101.

<sup>24</sup> Ваҳобов М. Ўзбек социалистик миллати. – Тошкент, 1960. – Б. 323.

Бу икки хил фикрнинг қайси бири тўғрилигидан қатъий назар, Маҳмудхўжа Беҳбудий ҳамроҳлари билан Ўзбекистон большевизм асоратидан ҳалос бўлиши учун нажот излаб, Европа сари йўлга чиққан эди. Шу фактнинг ўзиданоқ Беҳбудийнинг кимнинг қўлидан ҳалок бўлгани маълум бўлиб турибди. Демак, Туркистон жадидларининг отаси, оташин маърифатпарвар ва ватанпарвар Маҳмудхўжа Беҳбудий истиқлол йўлида қурбон бўлган.

## Беҳбудий абадияти

Одатда улуғ инсонлар ёруғ дунёни тарк этганларида: “Улар хотираси авлодлар қалбида абадий сақланади”, деган сўзларни айтамиз. Бу сўзлар ўз вақтида Беҳбудий ва унинг сафдошлари шаънига ҳам айтилган.

Беҳбудий вафоти муносабати билан ўнлаб марсиялар, мақолалар ва хотиралар ёзилди. Шулардан бири шоир ва адабиётшунос Вадуд Маҳмуд қаламига мансуб бўлиб, унда қўйидаги юрак сўзлари битилган эди:

“Маҳмудхўжа Беҳбудий Туркистон деган ўлканинг бошлиғи эди.

Маҳмудхўжа Туркистоннинг йўлбошчиси эди. Маҳмудхўжа ўзининг Туркистон боласи эканини тушунган бир йигит эди. Шунинг учун у бизга, Туркистонга ҳар нарса эди... Маҳмудхўжа Туркистоннинг янгилик даври тарихинда ёруғ бир чироф эди”<sup>1</sup>.

Вадуд Маҳмуднинг бундан 90 йил аввал ёзилган бу самимий сўзлари ҳозир ҳам ўз қимматини йўқотмаган, десак хато бўлмас.

Биз Туркистоннинг янги тарихида ёруғ чироқ бўлган Маҳмудхўжа Беҳбудий тўғрисидаги рисоламизга сўнгги нуқта қўйишдан аввал адабнинг авлодлари тўғрисида ҳам мухтасар бир маълумот беришни лозим топдик. Аммо бундан аввал чор охранкасининг 1913 йил 9 ноябрда ёзилган маҳфий ҳужжатидаги

<sup>1</sup> Меҳнаткашлар тоовуши,, 1920 йил 8 июль

бир маълумотни ҳурматли китобхонлар эътиборига ҳавола этсак. Бу хужжатда қайд этилишича, Маҳмудхўжа Беҳбудий ўша йилнинг 17 сентябридан бошлаб нашр этилмаётган “Самарқанд” мусулмон газетасининг муҳаррир-ношири бўлиб, 41 ёшда, араб, Фоний маҳаллалик, Самарқанднинг рус қисмида истиқомат қиласди, хотини Шарофат (35 ёшда), ўғиллари Масъуд (12 ёш), Мақсуд (6 ёш), Матлуб (2 ёш) ва қизи Сурайё (8 ёш). Шаҳарнинг рус ва мусулмон қисмларида кўчмас мулки – уйлари, Кобуд волостида эса 10 десятин ери бор; ҳозирги вақтда турли ғалла савдоси билан шуғулланади. 1 ноябрдан “Ойна” журналини гашр этмоқда.

Самарқанд шаҳар полицмейстери полковник Шведов имзолаган бу хатдаги айрим рақамлар хато бўлишига қарамай, унда Беҳбудий ҳаётининг номаълум саҳифаларига ойдинлик киритувчи маълумот ҳам йўқ эмас. Ҳурматли китобхон мазкур хатдаги маълумотни қиёслаб кўриши учун адибнинг қизи Парвин Беҳбудийнинг отаси ва ака-укалари тўғрисидаги сўзларини қуида келтирамиз:

“У (Беҳбудий – Н.К.) 24 ёшида уйланган. Унинг тўрт фарзанди – уч ўғил ва бир қизи бор эди. Катта ўғил Масъуд 1897 йилда, қизи Парвин 1903 йилда, ўғли Мақсуд 1909 йилда, ўғли Матлуб эса 1913 йилда туғилган.

Катта ўғил Масъуд Беҳбудий янги жадид мактабини – Шакурий мактабини тугатгач, гимназияга ўқишга киради. Гимназиядан сўнг у бадиий таржимон бўлиб ишлайди, адабиётшунослик билан шуғулланади”<sup>2</sup>.

Афсуски, Парвин Беҳбудий Солиҳ Қосимов билан қилган сұхбати чоғида онаси ва укаларини умуман тилга олмаган. Акаси Масъуднинг кейинги тақдири тўғрисида ҳам бошқа бирор эътиборли маълумотни бермаган. Лекин у шаҳар зиёлилари орасида отасининг дўстлари кўп бўлиб, улар (Сайд Ризо Ализода, Кўқонбой Абдухолиқзода, Шакурий ва бошқалар) ярим тунгача сұхбатлашарди, деган сўзларни айтганки, бу маълумот

---

<sup>2</sup> Қаранг. Саидов Ҳ. Маърифат либосидаги озодлик. – Б. 149.

Беҳбудийнинг даврадошлари тўғрисидаги тасаввуримизни янада кенгайтиради.

90-йиллардан бошлаб қатор адабиётшунослар Беҳбудий ва унинг авлодлари қизиқиб, бир неча мақолаларни эълон қилганлар. Адабиётшунос Зебо Ахророванинг ёзишича, Масъуд Беҳбудий отаси вафотидан кейин Тожикистонга кўчиб бориб, ўша ердаги матбуот органларида таржимон бўлиб ишлаган, кейинчалик педагогика институтида муаллимлик қилиб, тожик адабиёти бўйича дарс берган. Урушдан кейинги йилларда яна таржимонлик фаолияти билан машғул бўлган. Адибнинг қизи Парвин (Сурайё) ҳам Шакурий мактабида таҳсил олгач, рус муаллимлари қўлида рус ва француз тилларини ўрганиб, Самарқанд тумани Қозикўрғон қишлоғидаги мактабда француз тили ўқитувчиси бўлиб хизмат қилган. Вафоти – 1985 йил. Мақсад Беҳбудий усули жадид мактабини тугатгач, Бокудаги икки йиллик педагогик курсларда таълим олган ва Самарқанддаги мактабларнинг бирида муаллимлик қилган. 1931 йили 21 ёшида касаллиги туфайли вафот этган. Адибнинг кенжашарни Матлуб усули жадид мактабидан сўнг педагогик курсларни тугатиб, Жомбой туманидаги мактабда муаллим бўлиб ишлаган. 1942 йили Иккинчи жаҳон уруши майдонларида ҳалок бўлган. Шу фарзандлардан бири – Матлубхондан қолган Шавкатхон, Мидҳатхон, Надимхон ва Назирхон деган неваралар Самарқанд ва Душанбедаги олий ўқув юртларида оталарининг зиёкорлик ишларини давом эттирганлар. Ҳозирги кунда бу биз учун азиз неваралар ҳам ёруғ дунёни тарқ этиб, оталари билан бирга арши аълода яшамоқдалар.

Маҳмудхўжа Беҳбудий бу фарзанд ва невараларидан ташқари, туркистонлик юзлаб маърифатпарвар кишиларнинг майдонга келишида устозлик қилганки, миллий уйғониш даврининг бу улуғ намояндаси улар учун ҳам ота бўлиб қолади.

## МУНДАРИЖА

Дебоча .....
М.Беҳбудий ҳаёти ва фаолиятини ўрганиш тарихига бир назар ...
Беҳбудий қачон туғилган? .....
Ота-бобоси ва ёшлик йиллари .....
Муфтилик фаолияти .....
Ҳаж сафари .....
Маърифатпарварлик фаолияти .....
“Беҳбудия” кутубхонаси .....
Исмоил Гаспринский ва Beҳbuдий .....
Истанбул шаҳридаги учрашув .....
Биринчи ўзбек драмасининг яратилиши .....
Жадид адабиётининг муҳим соҳаси .....
Ижтимоий силсилалар гирдобида .....
Сирли ўлим .....
Беҳбудий қаерга бормоқчи бўлган? .....
Беҳбудийни ким ўлдирган? .....
Беҳбудий абадияти .....